

**OOTECH Oochu Takehniya Tinkles St.
MARK**

Beaver Mark

This Bible is in the Public Domain and is produced at cost by the Digital Bible Society (dbs.org).

This Bible, and many others, are available for free download in a variety of digital formats at dbs.org/bibles.

Language:
Country:
Publisher:
Copyright: Public Domain
Last Updated: 2023-10-20
ID: 0e79568d-8160-4f4d-b1bc-d1cde4e50d4c
ISO: bea
ISBN:



ST. MARK

Tghachyestla Ehlaiti.

1 Hatseto mawotich oochu Jesus Christ, Tikeaootli ma chue; ² Takeh nichatinkles akehe koonachatya kehe, Oosooasi sakewotihche nachatyea atghuni oochu naaootle.

³ Hligi otyesta tike kemweh toowe ooli, Atghuni oochu ahasoonesun, aghahati tsiwoeseh kwetooyakehe.

⁴ John tane tukeghingklit kemweh, hatse tane tatilon tunaghakeooskliti ahtilon otlwechi keochehlalon kehe aghametseli oneochetolel asilon. ⁵ Kahchu yinkhadeshalon tike okehe otsi Judaea, kahchu aghatane yateh otsi Jerusalem, kuihe sahke Jordan aghanetye tukukeghinklilon, koometselihi kooatuoochatih. ⁶ John ghatai manatsunne ghigheze gha eghayulon natun atyetlalon atazi syeh kahchu atazi syeh ihe nanihklulon: oohchu yaskesi yu achalinooyu ayilai yetsetlon; ⁷ Oochu toowe ooli yehtilon, yetsi ootelon, Hligi sooniya sataihchi anati, nakyeklule aghoo atu enasoo machi chunoostyeli mamakeoosut. ⁸ Suni la tu ihe naghakyeihklit: ahwole atai tu ihe naghakyeihlili Atsinde Oochu ihe.

⁹ Oochu gheise wazeluh ayi dzine, Jesus otsidesha Ion Nazareth Galilee otsi, John tuyakeghinklilon Jesus Jordan otsi. ¹⁰ Kwete tu tsi tghatyeya tsiwohzon, wailon yake kwa matahatsataghiolon, yakeotine yetsi natezalon oietli etye: ¹¹ Oochu otech yake otsi atitsuklon, toowela ooli oti ihe, Nila otaihchi nwasti Sachue.

¹² Kwete atsinde achu tike tsi yatehalon kemwehchi. ¹³ Koochi kemwehchi atu tane nuklechi tioketi dzineke kooali, yakaotehun Metseli aghaghatai; kahchu ghatai metseli ihkyateslon; kahchu oochu woei oochu yetsinatilon.

¹⁴ Kootoo John kwechaghinhtyilon tane kwechaghinhtyinti, Jesus yuhchidesha Galilee, koohootyeh otech oochu Nagha Tgha makaoonadzutti otsi, ¹⁵ Kahchu toowela ooli, Tyeneti Nagha Tgha kyeyi: naghametselihi kyechahli, oochu otech oochu aha kootahti.

¹⁶ Ihtyeron tu chok Galilee tghamweh klontyesha, yailon Simon yu Andrew yu mekye yu tyemil tavesklu tu chok: atai tane taesklu tane eli. ¹⁷ Oochu Jesus toowela ooli yehti, Sakyetahtyel, kooh hanahooslihi oohchu hluge kehchi enahooslihi tane niyutooleli chon otsi.

¹⁸ Kwete taghatyemile echaghanelelon kikyehyeshalon.

¹⁹ Oohchu oontsutli tontyo tyesha, yaih James Zebedee machue, kahchu John mekye, atilon tachin ela ehkye atyi tyemil keyatinklulon. ²⁰ Kwete tyechi yehtilon: kwa taghata echughanelilon tachin ela ehkye atyi Zebedee oochu keotihche yu, oohchu kikyetyesklit.

²¹ Oohchu kochi ghatyestyetl Capernaum; kahchu kwete taneghaotatyech kwa kwiya menejitti dzineneh tane chehotyeh. ²² Oneghanintyellon yaotihche: kooatinti yaotatiheh otech oochu tatihi natsuti kehchi ayihoo mawoochuli, atu adeskles tane kehchi. ²³ Oohchu iehti kweh atiih hligi teze ta kwa taneghaotatyech yaghatai metseli ayiih; kahchu ootyestalon, ²⁴ Toowe ooli, Atu aghaitaniah; atu ooli nagha assitli iyo aoohti, nuni Jesus Nazareth otsi? Yuhchityala aghayaonila? Atanasti nelesi Nagha Tgha Maatsinde Oochu ooiih.

²⁵ Jesus toowela ooli yehti, yachioote, Atu oonatih yehti, setseghatayah yetsun tsi. ²⁶ Kootoo aghaghatai tsunale too yayaghinchil, oohtye ootyestalo, yetsi hadesha. ²⁷ Aghanetye ooghatesta, aghanetye chu koohtaghoati, tiyeohtye, yetike aloontye? ye tane tsi oochatihi koonte? Aha kootesti otech oochu gha saghatai mayis atu natset. ²⁸ Koohchu oonthe atyeh meghoyuh yito kwa Galilee.

²⁹ Ayite otsi, ghaghatestyeton taneghaotatyechi kwa otsi, kweghaghintyetyl Simon yu Andrew yu kwa, James chu John chu. ³⁰ Simon tsiyue ma tyelasatyi teskoone ayila, oohchu koohoohati. ³¹ Yechidesha yila inchut, kahchu tahyatinti; kwete ayi teskoone ayila yecheli, ayi oota yakeotihch.

³² Hatse kakhachi, naghioo, kiya nanila yatitine, yaghi chu mazichi yaghatai metselihi. ³³ Kahchu atghe ehlaיתי tane natihti tyechiklaghatati tusklahti.

³⁴ Kahchu atghazi tatihi akooyilalon ayeeah natlone yehtanintyelon, kooyaghatai metselihi natlon oonteslalon; kahchu atu ketselihoo wahti iyao-ohti, achi atayatilon ayiwooh ayehti.

³⁵ Kahchu hatlindo, setsehto tsitike satalon, hadesha, kahchu koondeshalon aghasuchalechi, kahchu iehti yachutatyeh. ³⁶ Kahchu Simon yehkyatehchi kikyehyestyetllon. ³⁷ Kikihtitsi, toowela ooli kiyehyeton, Atghe tane ninkhaghanatgha.

³⁸ Towehchu yehti, Tane natehsti otsidooshai kooche oohoostihi oochu, kootatooshigha lasasta aootye. ³⁹ Kahchu tane tsiwoghintalon taneghaotatyech kwa kwe Galilee, kahchu atsinde metseli ghayatehalon.

⁴⁰ Kahchu machitatestyel tane tsusachi yaghoone yatsi nioununisit, kahchu machi nachustachaklih, kahchu toowela ooli yehtilon Koooh koodinti ate oochu asaghoonlehassi.

⁴¹ Kahchu Jesus, atyetastihtoo madzye tatilon nati gha tiesunni ihe, yetsi tahtatitichlon, kahchu yakatehtich lon, kahchu toowela ooli yehtilon, Koooh koosti; kwakoola oochu anatyeh. ⁴² Tsiwohzon otatyech otye, susuchi yetselilon, kahchu oochu oohtyelon.

⁴³ Kahchu yatatilon tsiwohzon itintiah, kahchu oochu tyehalon; ⁴⁴ Kahchu toowela ooli yehtilon, Atu kahchu ooli ataoonti niwotine: kahchu achutiya, nazi yueh taneghaotatyech metihi, kahchu khaniah naoochu oohtyi ihe yaghi Moses za kyehchi, ata kiyutihi.

⁴⁵ Kahchu hadesha, oohtye awonetye khoodawootyelon, kahchu tike okehe khoodawootyelon, kwa hlilon Jesus atu tanetghakweya tyetachatlihi kwa iyu meheaootye, ahwole kemwehchi tike alilon, kahchu kiyinkhatestyettlon ewonetyetsi otsi.

Tghachyestla Onketi.

2 Kahchu kwiyalon Capernaum tahke dzine oolitatatich wazilate; kahchu kooachatilon ayiti nito kwa oota ko-ochati ihe mewoyu. ² Kwete natlone tyechi ghlaghatilon, kwa hlilon taghadesmanlon atulitah ookuzze ooli ghintlon kye, kwa hlilon tusla aghoo ooghata taghadesman ghintlon kye; kahchu sa yatatilon. ³ Kahchu kiyinkhatestyettl yatilonooh yatitih ihe, tyentane kooyahtyel. ⁴ Kahchu atu ugha ot-sighatatyel iyua aontye ootaneghutl kye, nighatilon anetiyyi ootaneghutl kye alinti; kootoo ghaghatagheoo yatilone, kitaghintsut takeustyi tyela satyechti.

⁵ Kootoo Jesus wai aha oochati, toowela ooli yehtilon ayi yatilone, Sechue, nametselihi naoonchatuleli.

⁶ Ahwole tahkine ayiti tyechii adesklesne, kahchu koodzye otsi indighateshalon, ⁷ Yeoogha ti teze atu oochu ateotype? mea metsehhi ka oontoolelassi kootahtye Nagha Tgha zon?

⁸ Kwete Jesus ataotio yaghatei intidesakehe, toowela ooli yehtilon, Yehoo oohtye naghadye ihe intidaa aontye? ⁹ Tyeyi meotena achatooti kehe yatilone, Nametselihi naoonchatooole; koolehe, Tsitike sinta, nustyi neodiah? ¹⁰ Atawahtih iyu aontye hligi teze Machue natsutti ayehi chode tike kakametselihi naghaoontoooleli, (toowela ooli yehtilon yatilone,)

¹¹ Toowela nesiih, Niiya, nustye nioodoo, nakwa ot-sidiya. ¹² Kwa kwete niiya, usty i nioodoo, kahchu hadesha aitye yai; kwa hlilon atghe yaooli, kiyaooli Nagha Tgha, toowela ghatyeh, Atu haoontyedi oohweytyi tahooli.

¹³ Kahchu tu chok meootyeha; atghe aghanetye machichatyeha, kwa yaotatich. ¹⁴ Intyizon ghayalu, yailon Levi Alphaeus ma chue sata sooniya mechetilichti, toowela ooli yehtilon, Sakyetiya. Kahchu niiya yekehtesha.

¹⁵ Hesai wazeluh Jesus yakwa kwesata atsitsoo, natlone tanechowhoine chu metseline chu Jesus yakahtetsi yaotatichne chu: oohchu ghintlone, kooketestyettl chu. ¹⁶ Kootoo hatseto adesklesne chu Phariseene chu kiyaiichi inka aghatsitsoo tanechowhoine chu metsetline chu, toowela ooli yehtilon yaotatichne, Yehoo yakaatsits aontye yakah chu tuaton tane chowhoine chu metseline chu?

¹⁷ Kootoo Jesus ootitsahoo, toowela ooli yehti, Yaghine oochu oontyene atu kiyinkhasootati yutane, yatitihizon: atu yuhchideya tyechi kooyusine tyeswe yaghitane, ahwole ayi atu tyeswe yaghitane chodeh kyetsahanoolehe koometselihi ooghatihuali.

¹⁸ Kahchu yaotatichne John chu Phariseene chu ooneaghatatihya toonkye: kahchu yuhchihatestyettl toowela ooli, yehoogha yaotatichne John chu Phariseene chu ooneatatehya aontye, ahwole nuni maghotintichne atu ooneatatehya?

¹⁹ Kahchu Jesus toowela ooli yehti, Maskyege la kwa nichiyehi kooyehkyatechi ooneatatelela la? kooyehkyatechtion atu ooneatatehya iyu aontye. ²⁰ Ahwole kwa kwete khoonahwozetasi, kootoo mka tuchainklitne kwiya kwa oochayihate, kahchu ayi dzine ooneatatyellassi.

²¹ Atu chu ooli koonde ale ooli tsatse ihe kyechatookkatassi, yaikoolle koonde ihe kechaghinghati kwa hlilon hleooyu awotiassi. ²² Kahchu atuline tata ahklitassi chiche tu koonde satsoone tontyeto otsi: atu chu chiche tu ooli tsatse tataoohklit ootookyeezasi, kahchu natesklitchiche tu, kahchu mataoosayih ootookyeezasi: ahwole chiche tu koonde ooli ta koonde chuhklitassi.

²³ Kahchu otles tghah niya achuniyehti Menejitti Dzine; kahchu yaotichne makye ghatehlu atghe inchaghakinesla otles. ²⁴ Kahchu Phariseene toowehchu vehti, Nye, yehoo kooghaghaghati aontye Menejitti Dzine atu tu dzine kooh ghatsati iyu aontye?

²⁵ Kahchu toowela ooli yehti, Atu makyeh ootahtyech tah oolila David aontli kootoo intaklinto kahchu tapatoo, atane chu ayi vehkyatiche chu? ²⁶ Kwiye sikoooh Nagha Tgha kwa, intyizon Abiathar taneghaotatyechi metihi chok acha, kahchu kiyatsetslon otles oochu atuline yetsitslon gha yai zon taneghaotatyech, kahchu yayigholon ayi yehkyatiche.

²⁷ Kahchu toowela ooli yehti, Menejitti Dzine achi-lalon tane gha, kahchu atu chu tane Menejitti Dzine gha: ²⁸ Ayigho teze Chue ghakaoodzut Menejitti Dzine.

Tghachyestla Taiti.

3 Kahchu tyetachatlihi kwa kwiya: ayiti teze natyelon mila taneskyelon. ² Kahchu kiyunailon, ooka ooli asityeh kha Menejitti Dzine nai; kitalih iyu aontye. ³ Kahchu toowela ooli yehti ayi teze mila taneskye, Hatelon atichi nazutooh.

⁴Tooweh chu yehti, Oochu la oochu keoouchuahch Menejitti Dzine, ketseliooh keoouchuahch? tane ghaghatai gha kasoochatooti gha koole? Ahwole atu ooghati. ⁵Kahchu anetye klokanatghalon madzyehat-sutooh, kyeoocheklah ihe tane dzye natsutti, tooweh chu yehti teze, Tahtatinti. Ooh kahchu tahtatintieh: oohchu mila natsaghintalon achune kehchi. ⁶Kahchu Phariseene achughatestyelon, kwete hla nighohanintalon yai chu Herodianuk, tihakehe soo ookitohtelu.

⁷Ahwole Jesus achutyezha yaghotine chu tu chok tsi: Kahchu tane natlone Galilee otsi yu Judaea otsi yu yekehtestyetl. ⁸Kahchu Jerusalem otsi, kahchu Idu-maea otsi, kahchu o-one otehchi otsi Jordan, kahchu aghatane ahthaze Tyre yu Sidon yu, ghintlon ke, ooghatitsuk chi ayi oochu keoahchi, kiyinkhadesha. ⁹Kahchu yaotatiche tatilon, ela ckok natsutli ootagha iiti wothoogha kooghohtyi tane natlon ke kha ati makechichiticha. ¹⁰Atane natlone yaghihti ihe; kwa hlilon yinkghanotyesuts yakatutihikha, anetye ayi tatihi akooyahine. ¹¹Tane yaghatai mindicheli kahchu kiyainchi ate, kyechinachustaklih, kahchu ghatyезul toowe la ooli kiyehiti ihe. Nuni Nagha Tgha Chue nelaoontye. ¹²Kooh oochu atu soohchiwoti atu atachutihikha.

¹³Kahchu khis ehkyeghiyalon, kahchu ayizon ayuti tyechi yehti: yachidesha. ¹⁴Kahchu keneti onketi matgha kliniyanila, yekyeootichigha, kahchu achutehalon udzih oohootigha. ¹⁵Kahchu ayulhi gha natsutti, kahchu atsinde metselihi hayatuhi gha: ¹⁶Kahchu Simon yindizi yakechioosun Peterlon; ¹⁷Kahchu James Zebedee machue, kahchu John, James mekye; kahchu nindizi yakechioosun Boanerges, ayi nahthunni uskyege chatyeh: ¹⁸Kahchu Andrew, kahchu Philip, kahchu Bartholomew, kahchu Matthew, kahchu Thomas, kahchu James Alphaeus machue, kahchu Thaddaeus, kahchu Simon ayi Canaanite, ¹⁹Kahchu Judas Iscariot, mazi atahootalon: kahchu nito kwa kwighaghintyatl.

²⁰Kahchu natlone natsughanestlalon, ehtye kwa hlilon atu otles atsitslon natlonke. ²¹Kootoo meootinoo ootitsukoo, achughatestyetl kiyuhchutigha: aghatune kooghatyeh, Tinditaodesooissi.

²²Kahchu adesklesne yuhchighatestyetl Jerusalem otsi ghati, Ayehi Beelzebub, kahchu yaghatai metselihi iiti otsi hayateha. ²³Kahchu koohchu yinkhawoti, kahchu too we yehti, tyecha otsi aghaghatai metselihi hatsatohtyel oontye ayi aghaghatai metselihi?

²⁴Kahchu hlahti tane natehti intsake yawoinklit ate, ayiti tike ii oowotoehassi. ²⁵Kahchu ayi nito kwa yaooghinkliti ate, ayi nito kwa oowotoehassi. ²⁶Kahchu aghaghatai metselihi ataniiya ate, kahchu tezi yanile ate, atu oowotoehassi. ²⁷Atuline kweyali iyua aoontye teze natsutti kwa, yenatunne yatatulelu, hatse tahyaghesklu teze natsutti; atezon ya kwa yaghonile iyua aoontye. ²⁸Kwa hli anaghaisilon, Atghe metselihi kooya oochatoolelassi tane uskyege, kahchu soocha

oochatih: ²⁹Ahwole ayi ketselioo atii Menejitti Oochu atu ihlaotateoo ayehi kha, ahwole seghaai ayehi nioonizutti oonchatalihi: ³⁰Ayighoo ayehiti, Ayehi aghaghatai metselihi.

³¹Kahchu mekye chu ma chu iiti otsighatestyetl, kahchu tsehtsi nazutooh, kilati, kiyinkhaooti. ³²Kahchu tane natlone yaka tghanatihtsi, tooweh chu kiyehiti, Nea, noo chu nehtghizinne chu tsehtsi naghatehya ninkhaghanata. ³³Kahchu ateyatetla, toowehchu yehti, Mea anne eli, setghezinne koole? ³⁴Kahchu khlonkanatgha ayi yaka khlontyetsi, kahchu toowela yehti, Ahi anne chu sehtghezoon chu! ³⁵Atunne zon kooh ghawoteassi ayi Nagha Tgha indi, ayi akye chu, ustye chu, unne chu.

Tghachyestla tinti.

4 Kahchu tyigha tane ootatech tu chok tghamweh: kahchu natlone yinkhadesha, kahchu tachin ela ehkyiya, kahchu tu chok tih ali; kahchu atghe tane natlone tike wohzon. ²Kahchu yachioteh ooli natlon yughotyeh, kahchu toowe ehti otsiootih, ³Oochu atahtsuk; Oochu hadesha otles alihi tane anihiyihi niyil-ihi gha: ⁴Kahchu intyizon achunihyehti, tahkine yainkhyi tinkuzze, kahchu chua etye yaghatehtyellon. ⁵Kahchu tahke nooghinklit tsyetgha, atu oonchadi tike ooliite; kahchu kwete ghanaghiyu, atu tike tatghoe: ⁶Ahwole chelon sa niniya, maziche ninihklitlon; aha oona maghaye toontooyei, ayi ihe taihtsutii. ⁷Kahchu tahke nooghinklit ghooos chine chok tgha, kahchu ghooos chine chok ghanaghiyu, kahchu klightani-tyetUon, kahchu atuli machiche oolilon. ⁸Kahchu achu nooghinklitlon tike oochu ti, kahchu machiche ooghi-lyelon ghanaghiyu yu kahchu tainyезho; kahchu yahlonihyu tahke taoketyi tahke chu edzetaiti ketyi, tahke chu keoneti ketyi.

⁹Koohchu yehti, Yaghi matsaghe ooli, inkai ootoot-suke yehti.

¹⁰Kootoo chlatyo ayi yehkatyelichi yaghi chu keneti onketi matgha tawotyа yehti kawotzutne gha.

¹¹Kalichu toewela ooli yehti, Naghunni aghaoochu-neoh aoontye atawohtihiglia tyewotyе hai koosti Nagha Tgha kyeyi: ahwole ayine tsehtsi natihne, atghe ooli keowaahch yehe achatih: ¹²Wai oochui, kahchu atu hlyenahotih gha; kahchu ooghatitsukoo oogha-tootsukassi lon, kahchu atu klaghatootsukassilon; koohchu oolita ghooghanetyela, koometselihi kooya oone oochatulel akhe.

¹³Kahchu toowela ooli yehti, Tiyeghakehe atawahti-ha ooli kehe yaghaghahtai kehe? koohchu yeghateh atawahtiha atghe otech? ¹⁴Oonehyene oonehyoh sa. ¹⁵Kahchu aghatane tinkuzze tatihne sa chunihyehti; ahwole kootoo ooghatitsukassi kooh ghaghatai metseli kwoto otsidesha, kahchu yazake yuhnyatiooh yadzye ta otsi. ¹⁶Kahchu aghatane chunihye ine tsye tgha; kootoo sa ooghatitsuk, kwete neoatiooh

soochanetye; ¹⁷ Kahchu atu ghai ighutaklilon aghatane hahte, kwa tiotsi zon ghaghatalon, ootlwe kootoo sookhaootaya kootoo hlachatatane niwoya sa tachi kwete chahte intighatesah. ¹⁸ Kahchu aghatane ayi yachunihyene ghoos chok chine tgha; ayi sa ooghatit-suh, ¹⁹ Kooh tidi tike indi, kahchu mihe atsunnetahe yu mihe tatintlon yu, kahchu machachintye achu ooli kwenachaghila otcho ooli sa, kahchu atu machiche ooli. ²⁰ Kahchu ayi mehoochunihehe tike oochute; ayi ootitsukne sa, kahchu niooatioone, kahchu machiche ooli, tahke taoketyi enetyi, tahke chu edzetaitiketyi, tahke chu keonetiketyi.

²¹ Kahchu toowela yehti, Nachila takooche nichualli ghotwetghulle yue take usty koole? koohchu atu nichioote takoochechine? ²² Agha atuli nachunehi atu mewotuti; kahchu atuli tanetcha maghuchata iyu aontye, ahwole atachuteassi. ²³ Koole matsaghe oolyetane inkai ootootsukassi.

²⁴ Kahchu toowela ooli yehti, Tyeke ayi ootahtsukki: ayi ihe tikeghaklyeli, ayieh nagha tsi tiketsalelassi: kahchu naghai ootaghahtsukki, ootehchi nahachuallassi. ²⁵ Yaghi ayehi, machuallassi: kahchu yaghi atu ayehi, mehwayachutallassi koole ayi ayehi.

²⁶ Kahchu toowela ooli yehti, Koohia ootype oontye Nagha Tgha kyeyi, hletye teze oochunehyehti oodihyiti keoontye; ²⁷ Kahchu satyi, kahchu niya hatleke chu dzine chu, kahchu achunehyehti ghanaghihu, atu ataoti noontye sikoooh. ²⁸ Ghoo yaghi tike atai hahte ot-si ghanaghihu; hatse kloke eli, kahchu hachaghi-naghiyu, kahchu otlweh ootles. ²⁹ Kahchu yaghi chiche ghanaghihuta, kwete atataz, khooh chotazze dzine eli.

³⁰ Towehchu yehtilon, Tyechi otsi gha Nagha Tgha kehchi niwowotal aontye manatake? koole hletyi indi nighaootal aontye? ³¹ Hleoontye oochuniliyehti ehlatye yutanikluchi machiche, kwa nichalesta oon-ahyehe tike, eyi zon natsutli anetye oochu ihyehe tike tih: ³² Kwa aochelesta, oochu nichulesta ayi zon otehchi yaincha anetye nichulihchassi, kahchu matatse natlon; kahchu ayiti chua yayue sacha iyue tehtsi.

³³ Kahchu ayi etye akyehchi oochatihi ihe ehyatatilon, ghanawesittih oohasohtsoo gha. ³⁴ Ahwole atu ya-i-ti-tyes ate atu yachiwotyehlon: kahchu sahta aghatinta, yaotatichne atghe yatatilon.

³⁵ Kahchu ayi dzinee, kahkachi aocha, toowehchu yehti, Onka nataghokye taityechi. ³⁶ Kahchu yite kitehalon tane natlone, nighatila aontye sikoooh. Kahchu kooyeh testyetlon tachin ela ihe. ³⁷ Kahchu intsi chok niya, kahchu tuyune nachalon tachin ela kooyeghe tiketlalon, kwa hlilon tadesmanooh. ³⁸ Ahwole atai haiseuhi, satyi tsiatakyeh: kahchu tsikiyaniha, toowehchu kiyehiti Metihi, atu aghaititawoala tghataozitassi?

³⁹ Kahchu niya, kahchu intsi tsiwoti, toowehchu yehti tu chok, Tyeke tahtsi. Kahchu intsi atyehzut, kahchu ohtye tyesghutl.

⁴⁰ Kahchu toowela ooli yehti, Yehoogha onenatyetl aontye? yehoogha atu a kootahti aontye? ⁴¹ Kahchu

ohtye onighanintyetyl, kahchu toowela klaghatati, Ye teze alontye koole intsi ateate chu tu chok yuzehtso?

Tghachyestia hlahcheti.

5 KAHCHU nighatiooh taityechi chisinchi tu chok, kootike tsi Gadarene matike. ² Kwa kootoo tasaya ela ehkye otsi, kwete yatityesha ehlatye teze natine kwa otsi ayehi yaghatai atu mayis natsutooh, ³ Makwa ooli natine tgha; kahchu atuline yatahnatsut iyu aontye ihe ayii ihe atu tah taghatsakluh iyu aontye, atu satsoone klule aghoo ihe taghachakluhassi: ⁴ Tewotye oontlon tahtsughesklul mihe klule ihe kahchu satsoone klule ihe, kahchu satsoone klule yatayaghechil, kahchu makye chine klule oochu yatayaghechil: kahchu atuline oochu ayilih iyuntye. ⁵ Kahchu inkaa hatleketahwoyu dzinetahwoyu, ali khis tah, natine tgha woyu, otyesta, kahchu atakhai tatazo tsye ihe.

⁶ Ahwole tontye tsi ghotsi Jesus ya-i, otsitehtla yatsi nachustaklyeh, ⁷ Kahchu ohtye otyesta, kahchu toowela ooli yehti, Tyeka kehe na-kye-o-os-tyi-cha, Jesus, nuni otehchi ooli yatehchi Nagha Tgha chue neli? Natsinioonunisit Nagha Tgha tsi, atu nidisawositi.

⁸ Atai toowela yehtie, Sachighatiya teze zi tsi, nuni atu neyis natsutti aghaghintai.

⁹ Kahchu tawotya yehti nindizi tyeooyla yehtilon? Kahchu toowela yehti, Legion, oohzi: nitlon ihe.

¹⁰ Kahchu yatsinioonunisit atu achu tsutoohigha ayiti tike otsi.

¹¹ Kahchu ieti alii hwaza khis tah koohkoos natlon eghihta. ¹² Kahchu atghe aghaghatai metselihi yatsinioonunisit, toowehchu yehti, ghotsiaghatiha koohkoos natyehti, koohkoos zi toontyelikha. ¹³ Kahchu kwete Jesus ghatyeh yasehla. Kahchu naghaghatai atu mayis natsutti ghaghatestyetyl, kahchu koohkoos zi tintyetyl: kahchu koohkoos ohtye kyehodihsut ichulti tu chok tghamweh, (oolitah onkye keoneti keoneti;) kootoo chu etye tukooghiwolon.

¹⁴ Yaghaine koohkoos zaaliine taghatestyetyl kooghohwati nito kwa atyih kahchu ayiti tike. Kahchu ot-sighatestyetyl ayi ye keochaahch aontye. ¹⁵ Kahchu Jesus kiyunintyetyl, kahchu kiya-i ayi tane atsinde metselihi ayehi, kahchu kootoo ayehii ligiona, sata, kahchu natunne tasata, kahchu tyeswe indi ahi: kooh onighanintyetyl. ¹⁶ Kahchu yaghine oohwa-i ine kitati oontye sikoooh ayi tane atsinde metselihi ayehi, kahchu koohkoos ihe. ¹⁷ Kahchu tyikichi nioghaghahanintyetyl achutooyigha kootike otsi.

¹⁸ Kootoo tachin ela ehkyiya, yaghi ayehii tane atsinde metselihi yachinioonunisit yehtootyeli gha.

¹⁹ Atu ghate yasehla Jesus, ahwole toowela ooli yehti, Ootinta niootinoo khadiya, oochu kootinti ooli Ghakaoozutti nakeoahchi, kahchu noohchuya.

²⁰ Kahchu achutyeshu, kahchu khoodaootyeh Decapolis yechatgheze Jesus oochu nanakeochaahch: koohchu aitye tane khaooghali.

²¹ Kootoo Jesus natyeski tachin ela ihe taityechi, natlone tane yachitestyetyl: kahchu hwa tuchok alii. ²² Nea koohzon ehlaite yinkhatyasha kakaoozutti tyetachatlihi kwa, Jairus ooyi; kootoo ya-ichi, nakye kuchi naitsut, ²³ Kahchu ohtye koonoo yachinioonunisi, toowehchu yehti, Setue tyele satyi koola tehtsutooh: nachinoo-nunisi, samakataootihi, naghaootai gha; koohzon hanalaite ootesi. ²⁴ Kahchu Jesus yehkatich, kahchu natlone tane yakehtestyetyl, kahchu kikyeeohsut.

²⁵ Kahchu ehlaite tsege, yaghi keneti onketi matgha yaskehe matulle natatyehizon, ²⁶ Kahchu natlone ooli yakeoohchi natlon yutane, kahchu yaghatetla ayi oontyeyi, atuli akehe naghiteyo oontyeyi, atatihe tati, ²⁷ Kootoo Jesus otsi ootitsukoo nooja otsi keistla otsi yatsityesha ootaneghutl ihe, kahchu yakestue katehtich. ²⁸ Atune toowela ehtie, Manatunne zon aghoo katyestich ate, oochu awostyeassi. ²⁹ Kahchu kwete ot-si tul natatyehiti sakoon; kahchu atyetastyiht mazi tsi nachagihta avi tatihi tsi.

³⁰ Kahchu Jesus kwete ataotihoo mehnatsutsutti mazi tsi hatsatooh, natunesha tanetische, kahchu ehti, Mea ali senatunne katehtichlon?

³¹ Kahchu yaotatchine toowela yehti, Natlone tane ghii tanighatlu, kooh tinti, Mea sekahtichtich?

³² Kahchu klokanatgha yui gha ayi ooli keoachine. ³³ Kahchu tsege ooniya kahchu ghati ihe, ataootioo ooli maachahi matsun tsihi, yuhchi yachi yuenenitooh, kahchu yatati aitye hlonchati. ³⁴ Kahchu toowela ooli yehti, Ghutue aha koodinti nanaghinta-iih; taichi tyege inditiah, kechutintih natatihe ihe.

³⁵ Intyizon kwaka ootatyichoo, yachidesha ma kwa otsi yaghi yakaoozutti tyetachatlihi kwa tahkine atine, Netue tehtsut: Yehoo gha mehchintahcha otehchi Metihi?

³⁶ Kwete Jesus sa ootitsukoo, toowela yehti ayi kakaoozutti tane tyetachatlihi kwa, Atu ooniooya, aha koodinti zon.

³⁷ Kahchu atuline hateh gha sehla oolino yekehtooyi, Peter zon, kahchu James, John chu mekye James.

³⁸ Kahchu khooniyalon kakaoozutti kwa, kahchu wa-i oontlon tsi oochataahoo, yaghi chu atsukki kahchu ohtye atsukki. ³⁹ Kootoo kwiya toowela ooli yehti, Yehoo gha oontlonchi ootahah aontyeyi, kahchu aht-su-ko-oyu? ataze atu tehtsut, ahwole satyih.

⁴⁰ Hatyeh oontlonchi kiyuhaghatakluch. Ahwole ehtyeron aitye hayateha, otsighadesha yatgha chu you chu ata, kahchu ayi yehkyatechii, koohchu kwinnaghacha ata tyelasatyinti. ⁴¹ Yila inchutlon ata, kahchu toowela yehtilon, Talitha cumi; ayi chati, Ata, niiya, nesii. ⁴² Kahchu kwete ata niiya, kahchu ghayahl; atai keneti onketi matgha mayaskehe. Ohtye o-ochi khaoohalilon aghawochule kehe. ⁴³ Ohtye atuline tataoonti; kahchu atya kehe oolita ooli machuhchut.

Tghachyestla edzetaiti.

6 KAHCHU ieti otsi achudesha, kahchu yuhchidesha ghochati matike; yaotatchine chu yekehdesha. ² Kahchu Menejitti Dzine khoonionizu-tooh tye tyetachatlihi kwa taneghaotatyech natlone kootitsakoooh khawoalli, ghatih Tyecha otsi niyatilon-tye? Kahchu ye o-ochi mehoochayu tidi machioo, koole yaghi oochu ekyeotatchi ayilai tila ihe? ³ Atu ayila tachin atali, Mary chue mekye James, Joses chu, Juda dm, Simon chu? kahchu mehtghezze chode mekyechatich? Kalichu atu oochu yatsiintighadesa.

⁴ Kahchu Jesus toowela yehti, Tane chi otine tune atu mooh oontue iyu aontyeyi mehe meachatachai, atunezon tatike hwa yule iyu aontyeyi, kahchu atai hahte menachine, kahchu atai hahte ghochatih makwa.

⁵ Kahchu ayiti atu kooye keoahchlon mehmawochuli kewotiche, tahkine ghatyeh katehtichlon yatitine, kahchu nayaghihtalon. ⁶ Kahchu kawolilon atu aha yutieh. Ahwole atghe tane tanenatih akehe klodeshalon, taneghaotatyech.

⁷ Kahchu keneti onketi matgha tyechi yehti, eonetye tsi yeteha onkyetatyeyi; kahchu yehnatsutti yayila yatanatsutti naghaghatai metselihi;

⁸ Kahchu aychti atuli yatoolai kyatehchu, tghes zon; atu etsunzis, atu chu otles tyes ali, atu chu sooniya kooghele tasulla: ⁹ Hoontyegho kyetlihi ahoon zon tatyeyi; kahchu atu onketi kestue taooya. ¹⁰ Kahchu toowela yehti, oolitalah nito kwa kwighaachatetah, ayiti ahli achutahaz ti otsi. ¹¹ Kahchu atu ninaghatile ati, naghatitsukki ata chu, aisai iiti otsi achutaach ate, naghakye waghat otles ihe kooyeh ooghahtichi. Kwa hli anaghaisii, Otehchi aghatane Sodom yu Gomorrha yu oochu awohtyeyi ohtyeyi tane tsiochatih dzine intyizon ayi tike.

¹² Kahchu achughatestyetyl, kahchu tane taghatih ket-selihi ooghachatutii gha, ¹³ Kahchu natlon metselihi ghaghateha, kahchu kles ihe yakiyehkluk yatitiine, kahchu nayaghinta;

¹⁴ Kahchu metihi tyiyi Herod otitsuk mewoyu; (atgheze tike okehe midizi khoochatiihe;) kahchu toowe ehti, John matukeghinkliti atai tustyeyi otsi niiya, kahchu ayiwo mehe ohtyeyi keochatichi eotatyeyi aontyeyi.

¹⁵ Achune ghati, Elias atai, kahchu achune ghati atane tai atahwotine, ehlatine eontyeyi atane tai atahwotine.

¹⁶ Ootitsukchi Herod, toowe ehti, John ayi matsi hlihy-itl ii: tsitike nesta tustyeyi otsi.

¹⁷ Atai Herod ghochati ochiyateha, John chu niyatinti, kahchu tane kwechayihiti tayaghesklu Herodias ihe, mekye Philip tsiyue ihe: atai inkah hlakootsila. ¹⁸ Atai John ayehtii Herod, Atu wotezi nai awohi nekye tsiyue. ¹⁹ Ayeoo Herodias tike ochehtune yesoohail akhai; ahwole atu hawootli iyu maaontyeyi: ²⁰ Atai Herod John enejitieh, atayetioo tyeswe ghata, kahchu maghata

oochu tane elieh teze, kahchu yama intityesha; kahchu yatitsukchi oontlon kehe keoachlon, kahchu kyena-wolesilon ayiteh otitsuk ate.

²¹ Kootoo sookah nitsutooh dzinee khonioonizutooh Herod niyi dzinee khonioonizutooh hatleke eghohtai gha oola tametihi gha, simakunnis metihi tyiyi chu, kahchu haladi kha kakaozuni Galilee; ²² Kooh kootoo Herodias matue kwiya tahtitla, kahchu yakeneli Herod chu, ayi yakasatai chu, metihi tyiyi toowe ehti ayi atyedi, Soodinkyet ooli sachinioonunisitassi, atuli necho matuhsesi.

²³ Kwete oochu ayehti, Atghaze ooli assyesi oochu gho soodinkyet ate, tghatichi ooli assi naselasi.

²⁴ Kahchu hadesha totsiti anna. Ye ooduskyet aontye totsiti ehtilon? Tsiyua so toowe ehti, John matukeghinkliti tsi.

²⁵ Iteteh kwete metihi tyiyi tsidesha, kahchu atakyet, kooh koosti atezon sahoalli tsa ihkye John matukeghinkliti tsi.

²⁶ Kahchu ohtye metihi tyiyi atu kenelilon; hoontye ooli oochu ati ihe, kahchu aghatane ihe kookasata, atu yaza ootihyul. ²⁷ Kwete chu metihi tyiyi outsideha teze, kahchu matsi naghahal yehtilon: kahchu otsidesha tane kwechayehti yetisi hlihyitl. ²⁸ Kahchu yetisi nanioo tsakye, kahchu atyedi ghioo: ooh ayi atyedi to ghioo. ²⁹ Kootoo yaotatiche oghatitsuk chi, yachihatestyetl kahchu yazeche nighatihtyi, kahchu natine kwati naghanihtyi.

³⁰ Kahchu wochichatehane aghanetye intataghati Jesus aliiti otsihatestyetl, atghazi kitatati ooli, keooaachii, kahchu ooli tanegha ootatyechine.

³¹ Kahchu toowehchu yehti, Tyetahtyel naghai tyinta oolite yaghi kemwehchi, kahchu oontsutli natahyih: kootoo natlon yuhchighatestyetl kahchu yiteghatestyetl, atulita ahwosits kuzza ooli.

³² Kahchu naoonai ela tu chok ehkyeatachi ehkyeghaghityetl. ³³ Kahchu tane kooya-ih achughatestyetlooh, kahchu natlone atakooyehi, kahchu tane natihti otsi atghe otsi ooghatehsut nito kwa otyiyi aghoo anetye oogha-i, kahchu tane tse nighanintyetyl, aghanetye kiyunintyetyl. ³⁴ Kahchu Jesus hadesha natlone tane gha-ih, ohtye matsun tatihti kyehe indityesa, uspai etyeh uspai ghaghatane tane atu ayehi: kahchu tye yaghotatich natlon ooli.

³⁵ Kootoo ayi dzinelon kwakoole tontyeto kloeh ooli, yaotatiche yachitestyetl, toowe yehtilon eh, Kemwehchi oolilon chodeh, kahchu kwa oonchadeh dzine kloeh ooli: ³⁶ Achuyadeha tike okehe otsighatatyel, kahchu nito kwa ootlonchi, kahchu ataheghatutlihi gha otles tyes: atuli ghatsitsi aghahi ihe.

³⁷ Ateyatetlalon hoole toowehchu yehti ihe, Naghanilon kiyioohtai kooyanahli. Kahchu toowe kiyehi, Yaghe otsi tawotyeli ataghawothhi ila sooniya onkye keoneti ketyi sachunai ehtye otles tyesa, yaghine ghaoohchuti?

³⁸ Toowela ooli nayetilon, Taitya otles tyes ahiwo? oonkawahya. Kahchu ataghowatichi, toowela ghati, Hlahcheti, hluge chu onketi.

³⁹ Kooh yehtilon eonetye tsi tahtsi kloke tanepyedstgha. ⁴⁰ Kahchu ghatye gheskyih inchake, keoneti ketyi tatehtsi inchinatatyel, taghane chu hlahcheti ketyi inchinatatyel tatehtsi. ⁴¹ Kahchu hlahcheti otles tyes niyatila hluge onketi chu, kooh tike ookahtgha yatsi kahchu merci yehti, kahchu otles tyes yataghiyits, kahchu yaotatiche ghila yanyulel gha; hluge onketi chu anetye tghaestich. ⁴² Aghanetye eghaghintalon, oochu tataghanastolon. ⁴³ Kahchu keneti onketi matgha kloke asklu ghaisis tadesmanoo mechaghintai ihe, hluge ihe chu. ⁴⁴ Kahchu yeghaghintaiine otles tyes oolital hlahcheti keoneti keoneti ketyi sihlon enetyi sihlon tezo.

⁴⁵ Ieti tye kwete anetye ihe yutilon yaotatiche tachin elahkyeootyeli kha, kahchu taityechi otsighatuteligha haladih Bethsaida, achutehaton tane. ⁴⁶ Kahchu kootoo achuteha, atai chu yitaityesha khisi tsi yaootootyech.

⁴⁷ Kahkachi aoocha tsi, tachin ela tatiche tsi tu chok taghaliloo, atane nunkuchi sahti ali. ⁴⁸ Kahchu yai ohtye keotichoo atowazu; intsita oolieh: oolital hatlindo aoocha soo tane wohnyalon, tu chok khai niyalon, kahchu yaooeassilon. ⁴⁹ Kiyainchi tu khai niya, kooh kooghati tane atsinde ali lontye kiyutih, kahchu ohtye oonighanintyetyl: ⁵⁰ Aghanetye kiyai, kahchu atu oochu indighatyesalon. Kwete inchi ooghatestyel, kahchu toowela yehti, Ohtye soonahtye: suni asli aontye; atu ooneghahtyel.

⁵¹ Kahchu inkhadesha elahkye atine; kahchu intsi adezut: kahchu ohtye khawoghali, kahchu o-ochi khawoghali. ⁵² Atu ayi indi ghati ihe ayi o-ochi keochaachi kehchi otles tyes: aghatane koodzye natsuttieh.

⁵³ Kootoo naghateskyi tsi, koonaghaghintyetyl tike Gennesaret, kahchu tghaghiyetyl. ⁵⁴ Tghaghiyetyl tsi ela ehkye tsi, kwete atakiyeti, ⁵⁵ Kahchu kyeton ghatich aonetye ieti otusinkha, kahchu kyekyeyehtich ayi tyelisatyii tatihi, ali iteh oohatitsukooh. ⁵⁶ Kahchu kwiyah assitih nito kwa chisnchi, nito kwa otyiyi koole, tike koole, nikiyityih ayi yatitine atghunni tiche koole, kahchu kichiniooohanunisit kikatutuhi gha ghatye makestue maihe aghoo kiyuhchuti gha; yuhchutassihne anetye yaghitalon.

Tghachyestla taiuohi.

7 KAHCHU anetye machichatyesha Phariseene, tahkine adesklesne chu, ha Jerusalem tsi ghatihne. ² Kootoo kiyainchi tahkine yaotatiche aghatsitsoo otlestyes atu ka tila tyeghinyekoo, ayi tsati, kila aghoo atu tyetsaghinyek, tahkine atu tyeswe kooghatilon. ³ Aghatane Phariseene, Jewne chu atghe, oontlon chi taghila tyenaghatichoo zon aontye, atu aghatsits athli, kooghatghoonoo yaootyati hatseto koola

otehchi meetiootyeha. ⁴ Kahchu naghatichta ataghe tsi, atu natsun nootootihul ate, atu awoontsitsassi. Kahchu ooli natlon ooli nikitilaine o-otghooni, tsa nootoochatuhul kahchu mihe tu tsato chu, tanihkluchi satsoone tataoochayihhi takehchestai chu.

⁵ Kahchu Phariseene chu yatiklesne chu, Taotya kiyehi, Yehoo gha mawotintichne atu nakyehchi indi gha tyes aontye tane haladi otichne tane, ahwole otles tyes eghaghinta atu tahila tyeghaghintyekoo?

⁶ Ateyatetla, kahchu toowe yehti, Oochu naghai nasetyilon Esaias naghani oontlon nahtahoo, takehnichatinkles akehe, Ayi tane oochu assaghati taaza ihe, ooh koodzye tontye saoh.

⁷ Ghatye ahwole kooyaootastech tanegha ooghatatyechoo tane mihe chioochatihi.

⁸ Tyinta saoo Nagha Tgha otiche, ooahtghoon tane yaghita kehe, nootghochadehulli mehtutsato tsa chu: kahchu ooli natlon ayi etye keoghaach.

⁹ Kahchu toowe yehti, Oochu Nagha Tgha zake kye-naghali, maghahtai yu aontye nagha onti. ¹⁰ Atane Moses kooehtii, Ohtye natgha chu noo chu tao-oncha; kooh hatyehlon ooline tatgha tsi to yu ketseliooh otih ate, chazuhelassi: ¹¹ Ahwole naghai atahti aontye hoontyeoo ooli tatgha koole to koole, Corban ayi, ayi tsati, kachiahi, yaghi ooli nakeoostich iyu aontye; kao-ontsutti. ¹² Kahchu atu otehchi machi niioonunahsit ooli yaaootli tatgha koole to koole; ¹³ Naghai hahte tsioone Nagha Tgha zake awahtla atuli kyewoti nagha oonti ihe, kanaooyi: kahchu ayi etye natlon ooli keoaahch.

¹⁴ Kootoo chu aitye tane kawoti tsi, toowola yehti, Anahtye soozahntsoo naghani kahchu atahtsuk: ¹⁵ Atuli ayi tane matsun khitsi tatyekut ayi mazi ti achi chah-tayuleassi: ahwole yetsi hayatehai ayi ali tane chahte ayihihchi. ¹⁶ Ooline matsakhe oolitane iiti ootoot-sukissi, inkai ootootsuk.

¹⁷ Kootoo tane oochu tyesha nito kwa, kwenaghacha yaotatichne taoontya yehtilon hleoontye akyehchi oochatihi. ¹⁸ Kahchu toowe yehti, Kooka naghatsi toontoe aontye? Atu kyanahthihela, ahtghazai ooli tsehtsi otsi kwetsutti tane, atu chahte ayili eyontye; ¹⁹ Atu madzye tsi ihe ahakootyeh, ahwole mapat tsi, kahchu hatsat oochu sookah nininkyieh aitye etsun?

²⁰ Kahchu toowe ehti, ayi tane tsun tsi hadehtsutti, ayila tsahte ayihihchoonte tane. ²¹ Koodzye ta otsi tane, ine tsi tatyestek ootype indi metselihi, soochachai chu, nakhochityeli chu, tlahchazaghai chu, ²² Atsunne achuneih chu, machachintyi chu, inditselihi chu, oochachiti chu, naoona-i indyetselihi chu, atai metselihi chu, atacho chunehlihi chu, achachatachai chu, tsaoochayaghi chu. ²³ Anetye ooli metselihi kwetsut tane tsun tsi, ahwole tane tsahte ayila.

²⁴ Ayiti otsi niya, kahchu tghanatyeha Tyre yu Sidon yu, kahchu nito kwa ootaghacha, kahchu koonoo atuline atawo-oti kootilon: ahwole atu nana-i iyu aonyelonyelon. ²⁵ Ehlaiti tsege matue ooli ayehii atsinde met-

selihi, ootitsuklon, kahchu yuhchideshalon kahchu makye keh nadsutlon: ²⁶ Yaghi tsege Greek tane, Syrophenician ine tsi ihe otsi tazelh; kahchu yachinioonunisit hayatoohai gha atsinde metselihi matue zi ta otsi.

²⁷ Ahwole Jesus toowe yehti, Inkai hatse tsito tatanooto; atu oochu tsito taghaotlese kooyehwawachutalli, koohchu kli tsi tsatulihi.

²⁸ Kahchu ateyatetla kahchu toowela yehti, Ehye, aghaghintaihi: hoontye ooli takyeh yechihtati yue natunahtyeli kli tghaohtsi.

²⁹ Kahchu toowe yehti, Tidi sa ihe oodinta; atsinde metselihi natue tsun tsi hadesha.

³⁰ Kooh niya tsi takwa, yihtyi atsinde metselihi hade-sha tsi, koohchu matue takyeh ustyehi keh tyelasatyehi.

³¹ Kooh kahchu yitaityeha Tyre yu Sidon yu otsi, ot-sidesha tu chok tsi Galilee, taghaniya Decapolis.

³² Kahchu kiyananioo hligi majih oontooehu, atu chu oochu ootaticho; kahchu yachinioonunisit kooya katootihi gha.

³³ Kootoo otsi yatehti tane natloni, kahchu yaji ta katihitich, kahchu ghizek, yetsoode chu katehtich;

³⁴ Kahchu yatsi ookahta, otyesta, kahchu toowe yehti, Ephphatha, ayi, Tahaootsitti. ³⁵ Itetyeh kwete maji ta hatachil, kahchu matsoode klule tihatuk, kahchu oochu otatich acha.

³⁶ Oochu atuline atawoti yehtilon: ahwole otaihchi atuline satsih atawotihi, otaihchi ohtye koohtyeh; ³⁷ Kahchu o-ochi kao-oli toowe yehtie, Atghaze ooli tsi-wohzon keoahchlon: oochu majioontoowene anayitla oochu ootootsuki gha, kahchu saintakline oochu ootootyechi gha.

Tghachyestla edzentyenti.

8 AYI dzine tane o-ochi natlone, kahchu atuli aghahi kiyutsitsi, Jesus yaotatichne tyechi yehti, kahchu toowe yehti, ² Satyaghissunni tane natlone, kooh kwa taiti dzinee sihaghahyeh, atuli chu aghahi ghatsitsi ooli. ³ Achu kootyehaitye tagha kwa tsi yaghatipatooh, woianh oohatootsittassi, natlone tontye tsi otsighatellyu.

⁴ Kahchu yaotatichne atetyataih, Tyechi otsi gha tayanooto tine tane otlestyes ihe chode kemweh?

⁵ Kahchu Taitya otles tyes ahi yehtilon? kahchu toowe ghati, Taiuchi.

⁶ Tane tsi tsiwohzon tahtsi tike wozon: ayi ninayatila taiuchi otles tyes, kahchu merci ehti, kahchu yataghiyits, kahchu yaotatichne ghila oochu yanyuleli; kwa kiyaniyila ine tane gha. ⁷ Kahchu akiyehii tahke hluge yaintsutle: kahchu merci ehtilon, kooh ehtii ine gha nichuleli. ⁸ Kahchu eghaghintalon oochu tataghanastolon: kahchu nachatanatyeh neghatila mechachelihi, taiuchi kloke ghaisis tghatatyehmanoo. ⁹ Kahchu ine eghaghinta, oolita tiko keoneti keoneti ketyi enetyi silon: kahchu achudehalon. ¹⁰ Kwete ela kyiya

yaotatichne chu, kahchu yuhchidesha chisinchi Dalmanutha.

¹¹ Kahchu Phariseene yuhchihatestyeta, kwete kichi sooghatayehch, kiyinkhanata yakachi otsi ehtoole taoontya kiyehchi. ¹² Kahchu ohtye hoontatachehlon matsinde otsi, toowe ehtie, Yehoo gha ine chi hlioolate kiyinkhanata ehtoole, kwa hli anaghaisii, atuli ehtoole naghachualassi tine maghestyekne. ¹³ Kahchu yechudesha, kwete elahkyiya taityechi otsi kahchu yi-taityesha.

¹⁴ Mawotintichne iine kiyutoonaghatihlon otlestyes kitoolai, kahchu atuli aghahii elahkye ehlaiti zon otehchi otles tyes aghahilon. ¹⁵ Kahchu yechiwoteh. Tyeke khaghahta mehotles chihutli Phariseene, kahchu mehotles chihutli Herod natunne.

¹⁶ Kahchu inchiowhatatyech, kooh atuli otles tyes assii ihe.

¹⁷ Jesus atawotihchi, toowe ehti, Yehoo gha inchiotahtyech aontye atu otles tyes ahi? atu ka atawahtihala, atahtsuk koole? kooka naghadye natat-sutooh sahoohwaoontye? ¹⁸ Naghatai chu ooli, atu ookanahtghaala? naghaji chu ooli, atu atahtsukila? atu chu kyejetahtila? ¹⁹ Kooya tseghila tsi hlahchete otles tyes hlahcho ootaye keoneti keoneti ketyi enetyi, tanetyi kloke ghaisis tadesmanooh nachatanatyel nita la? Toowe yehti, Keneti onketi matgha.

²⁰ Kahchu taiuchi aline kootghasitich tikooh keoneti keoneti ketyi enetyi, tanetyi kloke ghaisis tadesmanooh nitalala nachatanatyel? Toowe yehti, Taiuchi.

²¹ Toowehchu yehti, Yehoo gha atu atahtsak aontye?

²² Kahchu yuhchityesha Bethsaida tsi; kahchu kiyanihiyiti teze mataituehi, kahchu kichiniooghannunisi yakatutuhi. ²³ Kwa yila inchut ayi teze mataituehi, kahchu nito kwa tsi achuyetehti; kahchu yatai keghizek tsi, kahchu yakahtetichoo, taoontya yehti ooli ghiila.

²⁴ Kwa yachi tahyatii, kahchu ehti, Tane ghussi tachin etotyeni.

²⁵ Kahchu yatai katehtich, kahchu yitige ookanahta yehti: kootoo oochu oontyei, kahchu aitye tane oochu ya-iine. ²⁶ Kahchu yakwa tsi yeteha, toowe yehti ihe, Atu otsitaoooya nito kwa, atuline chu tataoonti nito kwa.

²⁷ Jesus hadesha, yaotatichne chu nito kwa tsi Caesarea Philippi; otsighatelu, Taoontya yaotatichne tsi ehtilon kooh yehtiihe, Mea ali saghatya tane?

²⁸ Kahchu toowela ghati, John tanetukeghinkliti tane ali: ahwole tahkine Elias ghati; kahchu achune atane-taihchi atawotine tane.

²⁹ Kahchu toowe yehti, Ahwole mea ne ahlaontye? Kahchu Peter ateyatetla kahchu toowela yehti, Nuni ayi Christ.

³⁰ Kwa yatati atuli tsi hohohoontye atuneoo.

³¹ Kahchu tyi yaotatich, teze chue atghazi ooli kawotoohunne, kahchu yenaooli hoola ale,

taneghaotatichi metihi chok yu, adesklesne chu, kahchu tsazughelyu, taiti dzinee kaohtzut ate kahchu tsitike naootenzi. ³² Kahchu ehtii ayi zake tanenichi. Kahchu Peter nayanaun, kahchu tyi chuhoontatyech.

³³ Ahwole natanyesha tsi yaotatichne chu kaneghtgha, Peter chuatahtichlon, toowe ehti ihe, Satuchi otsidiya nuni atsinde metselihi: atu indi natih Nagha Tgha tsi tatyessuttih, yaghi zon ooli tane tsi tatyessuttih.

³⁴ Kootoo tane tsi tyechi ehti yaotatichne chu toowe yehti, Ooline sakehtayeh ati, inkai oochit atu tuti ni-nayatoovali matsookhatayaghi, kahchu nakehtuyesi.

³⁵ Ayih sye nayaghoohtalon kyehghata kehe, tghayatu-alassi; ayi tayadesooatai kyehghata kehe suni tsi kahchu otich oochu chu, ayi nayahoohtenzi. ³⁶ Yechiha yatsi ewoyuesiha tane, tike okehe ootanatsut ateeo, tatsinde tghayaghatyeshai ate? ³⁷ Ooli sitah tyessooite taghatai tah? ³⁸ Ooline siooyale tane zake chu chode soochaghachatai chu kyidyetseli chu tanegha; ayilon atane tane chue yaoooyooli, kootoo yuhchininiye ate kochi soochunetyi Matgha keotichne oochune chu.

Tghachyestla kalaketi.

9 KAHCHU toowe yehti, Kwa hli anaghaisii tahkine chode natehyane atu koozetse nio-olyezi, naoghatyitsi ooli ate Nagha Tgha kyeyi khoonao-ozit ate mehnatsutsutti yu.

² Edzetaiti dzine kloke Jesus Peter chu, James chu, John chu hlyekeghatechlon, kwa hlilon otsighatyeshahis tsi ohtye nataghisatti sahte ooghatyi: kahchu yakaitghaityeh achu meotati. ³ Kahchu makestue mesaniti takulli kye yas etye; atuline chode tike hahtye takulli awolene ooli. ⁴ Kahchu klohnaaghityel Elias chu Moses chu: kahchu inchioghatatyech Jesus chu.

⁵ Kahchu Peter otyesta, toowehchu yehti Jesus tsi, Metihi, chode itli gha oochu: inkai taodatyedi kwa aotlihi; ehlaiti nuni gha, ehlaiti Moses gha, ehlaiti Elias gha. ⁶ Atu ti kehe atu ataotih ihe; ohtye oonighanintyeli ihe.

⁷ Koos inchi ghililon: kahchu sa ooghatitsuklon yatsi, toowe otieh, Tai la se Chue menusli: Soozehtso.

⁸ Intyizon, aoonetye ookaghanehtha, atuline otehchi kiya-i, Jesus zon kooyekatech.

⁹ Khis chi chyesta ghatestyetyu, yanaootatich atuline tataeonti ooli ohwehtyi, teze Chue niiya ate zon mazetse otsi. ¹⁰ Ayi zake kaghaghatalon, ayi yea tane zetse achatya oontye toon ghlaghatati.

¹¹ Kahchu yehoo gha kiyehchi, atesklesne yehoo gha koohatya oontya Elias hatse naoojezi?

¹² Kahchu ateyatetlalon, yatatio yu, Kwa hli Elias hatse niya, atghe chu ooli sookah nioonila; kahchu takehnichatinkles akehe teze Chue ihe, natlon ooli kaootoohanu, kahchu menachule. ¹³ Ahwole suni anaghaisii aontye, Elias kwa hli nooja, akooghati sikooh kooyekhatihch, takehnichatinkles akehe atanewoh.

¹⁴ Kahchu yaotatichne wohniya tsi, tane natlone yehkyatich chu yailon, adesklesne chu, taoontya tookooyetilon. ¹⁵ Kwete atghe kiya-ichi, atghe kaooghalilon, kahchu kichiodehsut yilaghinchutlon.

¹⁶ Kahchu adesklesne tsi, Taoontya nayeti?

¹⁷ Ehlaite chu tane natlodi otsi ateyatetla toowechu yehti, Metihi nananihtyi sachue ayehi atsinde saititakli;

¹⁸ Kahchu oolita yihchut assiti koochoontye yayaghinchil: maza tsi oohwoos ooli chu, maghoo natazutsun chu, toontiyazighai chu: kahchu taoontya kooyesi ma-wotintichne ghakitoohai gha; kwa hli kooyandatla.

¹⁹ Ateyatetlalon ahwole toowe ehti ihe, Naghai naghaje toontooe assine, taise tsi otsi naghai aostya aontye, taise tsi otsia naghatagha ooslya aontye? Sananaha.

²⁰ Kahchu kiyananiooh: ya-inchi kwete atsinde kooghoontye yayaghinchil; kahchu tike nadsut, kahchu yatatatyech maza tsi wohoos hailyi.

²¹ Taoontya yatgha tsi ehti taise toh otsi kooch hoontyontya? Toowe yehti tsito ali toh otsi kooch hoontye. ²² Oontlon chu tsichataintyi tyenayehtyech ahoo yu, chahteyuliassi: ahwole oolita aotunatlilhon ate, ahoohchunaya, kahchu ahachinootyeh.

²³ Jesus toowe yehti, Aha koodinti ate, atghazi ooli nakeotoonezi ayi aha kooti.

²⁴ Kahchu kwete ayi tsito tatgha tsi otyesta, toowechu ehti manatu ooli, Naghaghintai, kwa hwe a koosti; oochinootyeh atu a koolestihi.

²⁵ Jesus wa-ichi tane yuhchiinhlaghatelyu, atsinde metselihi tsightoye, toowe yehtie, Nuni naza oontoohi najih oontoohi ahoo yu atsinde nali, ohtye anesii, yuhchihadiya matsun tsi, atu chu mazi kahchu taooya.

²⁶ Kahchu atsinde otyesta, kwete chu yayaghinchil, kahchu yatsun tsi ghotyeha: kahchu tane zetse etyelon; ayiwola natlone, Tehtsut ghatya aontye.

²⁷ Ahwole Jesus yila inchut, kahchu tahyatihtyih; kahchu tsitike nesta.

²⁸ Kootoo kooyachi nito kwa, yaotatichne sahti wahtila yehtilon, Yehoo gha naghai atu nanitun oontye?

²⁹ Kahchu toowe yehti, Haoontyedi atu ghatyeh ooli ihe ghachatayach, neaghasuchuli zon atu atsutsits ihe chu.

³⁰ Ieti otsi achughatestyetl, Galilee chu kyechoghatestyetl; koochchu kootilon atuline atawo-otih. ³¹ Atai yaotatich ihe yaotatichne, toowechu yehti, Teze Chue tsataghinsut tane tgha, kahchu kizoohelassi; kahchu tsazehai ate, kahchu tsitike nawataizi taiti dzinee.

³² Ahwole atu ooghatitsukoo ayi zake, kahchu taoontya kiyutekhai ooianh kyeghanejit.

³³ Kahchu yuhchidesha Capernaum: nito kwa oota ati otye taoontya yehtilon, Yea khama ootahtyechii atghunni otichi? ³⁴ Aghoo atu yachutyehlon: aghatai hahte atghunni otichi hoonchati inchi sooghatatyehlon, mea otehchi chatinchai kha.

³⁵ Kachu nesta, keneti onketi matgha tyechi yehti, kahchu toowe yehti, Ooline haladi tooshai ate, ayi zon

hli haistlachi ayuhezi, kahchu tane gha aonetye gha keo-otechassi.

³⁶ Kahchu tsito niyatihtyi, kahchu tane kuzze nayenihiti: kahchu yakoone yinchut tsi toowe yehti, ³⁷ Mea so niyatuhtyeloo ehlaite ayi etye tsito sindizi kehchi, suni nisatintyi: mea so nisatuhtyeloo, atu suni nisatintyi, ahwole ayi yuhchisatyehai.

³⁸ Kahchu John ateyatetlalon, toowe ehtie, Meti, ghityii ehlaite atsinde metselihi hayateha nindizi ihe, atu chu naghaketayeh: kahchu nanitun, atu naghaketayeh ihe.

³⁹ Jesus toowe ehti koole, Atu nanaghahun, atuline keosahch akehe keo-oahchassi sindizi ihe, kwete ket-seli hakehe sachuohoteissi. ⁴⁰ Kahchu ayi atu chahte anahilai naghachinati. ⁴¹ Mea so chu naghaooolu ehlaite tsa taismanni tu woton tsindizi ihe, Christ ezon manatunne aghli, kwa hli anaghaisii, atu tayatooalassi machitikechalihi.

⁴² Kahchu ooline chahteyile assine ehlaite tidi nat-sutli aha sooti, otehchi ootaizi atunewoh mehnachah-tune kazze tsye ma koos echaghesklu ate, tyechunni-tyeh ate tu chok ticha tsi. ⁴³ Kahchu nila chahtontye ate, hlyenihul: otaihchi oochu nuni gha kweghoya tsaghatati achaghilihi ihe, nila onketi aghoo kochi otsitiya iyu aontye khon metselihi tsi, khon atu nanatsaisti: ⁴⁴ Nootya atu taikyehiti, khon chu atu nanatsaisti. ⁴⁵ Kahchu nakye chahtontye ate, hlyenihul: otaihchi oochu nuni gha kweghoya tsaghatati achaghilihi ihe, nakye onketi aghoo ghotsinachatutyeyi khon metselihi tsi, khon atu nanatsaisti: ⁴⁶ Noota atu taikyehiti, khon chu atu nanatsaisti. ⁴⁷ Kahchu natai nihe atu oochu ookaitghai ate, hanehchul: otaihchi nawotaizi Nagha Tgha tike tsi oowooeissi natai ehlaite ate, natai onketi aghoo ate otsinachatutyellassi khon metselihi tsi: ⁴⁸ Nootya atu taikyehiti, khon chu atu nanatsaisti.

⁴⁹ Aitye tane sootakun natghachulelassi khon ihe, tsichatullihii assi chu sootakun ihe matghaachulehesi.

⁵⁰ Sootakun oochu: ahwole sootakun natuetah sootakun matghachilihi, tyeha kyehea sootakun matgha awahhliha? Sootakun kyatihch, kahchu oochu eotine klahtyi.

Tghaohyertia keneti.

10 KAHCHU iiti otsi niya, kahchu yuhchiklodesha Judea ti otaihchi Jordan natyechi: kahchu tane yinkhatyeha; kahchu tane ootanaun akehe kooch otye keeoach ahli taneghaotatyechoo.

² Kahchu Phariseene yechitestyetl kahchu taoontya yehti, Oochu la teze tatsiyue yechanaolohu aotezi? kikaotyehunooh.

³ Kahchu ateyatetlalon toowechu yehtilon Tyeha kehe anaghehtya Moses?

⁴ Kahchu toowe ghati, Moses hatyeh kha syeklah takehnicatinklessi o-ochatihtyehi adusklesse, kahchu oonchatoohyellu.

⁵ Kahchu Jesus ateyatetlakahchu toowe yehti, Naghadzye natsut akehe ayi ihe naghatsi achateskleslon tidi sa. ⁶ Ahwole hatseto otsi tike ooli toh Nagha Tgha teze oola tsege chu. ⁷ Ayi otsi teze tatgha echeli to chu kahchu tatsiyue kah awoti; ⁸ Kahchu kooh chu onkeghatatyee kootsun ehlatootyeesi: atu otaihchi onkyeghatutyeesi ahwole kootsun ehlatootyeesi. ⁹ Oo ayi Nagha Tgha tsayaghehtichii, atuline inchake niyulel.

¹⁰ Kahchu nito kwa oota yaotatichne taoontya yehti kwaka inhligi tsi. ¹¹ Kahchu toowe yehti, Ooline assine tatsiyue odehtyetine achune chu makahtueh akoochaile ate, soocha keoach. ¹² Tsege chu tatsiyue odehtye, kahchu makahtueh achilai ate, soocha keoach.

¹³ Kahchu kiyanihiytyi tsito yechihai, yekatootihi; yaotatichne yachuoootatyech ayi naghanihtyisi ihe.

¹⁴ Ahwole Jesus wa-ichi, ohtye atu minihtike ooghilelon, kahchu toowe yehti, Ghateh kooyasahlah tsito yechihai sachaghatutyeli, kahchu atu nanahahun: ayi ihe nao-oaizi Nagha Tgha kyeyih tsi. ¹⁵ Kwa hli anaghaisii. Ooline atu niyatooti Nagha Tgha kyeyih yechinekehchi atu Nagha Tgha kahchi koowoyezi.

¹⁶ Kahchu yakoone ihe niyatintyih, kahchu yakatihtich, kahchu oochu yachi indityesa.

¹⁷ Kahchu yitai tyesha atghunni kehchi, ehlaityi yuhchidesha ghatlelu, kahchu yachinachustatalih, kahchu taoontya yehti toowe, Oochu Tanechiotyih, tawoshlaitea ahtaze wostazonha?

¹⁸ Kahchu Jesus toowe yehti, Yehoo gha oochu indityesa sindilon ha? atuline oochu oontye ehlaityi zon, ayi Tikeaootli. ¹⁹ Sa tsiwohzon atanati, Atu soocha aonta, Atu chu tane zaooheh, Atu chu anaooih, Atu chu ket-selihoo tsiwotahoonich neetinoo, Atu chu tane na-woah, Ohtye taghoooncha natgna chu noo chu.

²⁰ Kahchu ateyatetlalon toowehchu yehti, Taneghaotatich, atghe tidi kama indityeaiih yeshihto otsi.

²¹ Kahchu Jesus yakaihtgha, yuntyeh, kahchu toowe yehti, Ehlaityi ooli nainchi tehtsut: ootinta, anehisi anetye mataghaneli, tyetaisanaine chu ghatanale, kooh ohtye natatootlosi ya tehchi: kahchu yuhchidiya, kahchu ninaootiah ayi sookatiya-i, kahchu sakehtiya.

²² Kahchu atu oochu indityesalon ayi sa tachi, kahchu yitaiyeshalon atu keneli ihe: atane ohtye ooli natlon ayehilon.

²³ Kahchu Jesus klokanatgha, toowehchu yehti yaotatichne, Tewotye atatlale ayine matatintlone kwe-wootyelassi Nagha Tgha nataghe tsi!

²⁴ Kahchu yaotatichne yazake kaooghulli. Ahwole Jesus ateyatetla kahchu toowehchu yehti, Tsitohkaine, tahtye indatlaooch ayi kiyasooli mehmetatintlon kwewootyelu Nagha Tgha mataghe tsi! ²⁵ Ayi kyeotun-

ni ghatai kwewotyizoo apetsiche kaookoodi, o-ochi matatintlon ehlaityi teze kwewoya Nagha Tgha nataghe tsi.

²⁶ Kahchu o-ochi ghaooghali, toowe hlaghatati ihe, Mea mechua aghatoota?

²⁷ Kahchu Jesus yakaitgha toowe yehti, Tane la atu kookechi niointsit, Nagha Tgha la atu kooh hoontye: aha atane Nagha Tgha atghezi ooli mahechi niointsut.

²⁸ Kahchu Peter toowe tyi ehti, Nea anetye kyecho tacityetl, kahchu naghakyehtasityetliih.

²⁹ Kahchu Jesus ateyatetla toowehchu yehti, Kwa hli anaghaisii, atuline ooli kyeghachelihine nito kwa, mekye koole, mehtghizze koole, matgha koole, ma koole, matsiyue koole, maskyege koole, matsatle koole, suni ihe, kahchu otich oochu ihe, ³⁰ Ahwole otsinitooalassi keonetyi ketyi otehche enetyi too, nito kwane, mekye chu, mehtghizze chu, matgha chu, ma chu, maskyege chu, makyeyih chu, kahchu tsookatayaghi chu; kahchu achu tike tsi ghonioonizut ate kwihzon ehchaghatai. ³¹ Ahwole natlone haladi atine haistlachi awotyeissi; kahchu haistlachi atine haladi awotyeissi.

³² Kahchu atghunni aghatii Jerusalem otsi ghat-estyetlu; kahchu Jesus yaghatyeha: kahchu kawoghuli; kahchu kiyahsellu oonighanityetlon. Kahchu niyatila keneti onketi matgha kahchu yatatati yesoo yuhniyi ihe, ³³ Toowe ehti ihe, Nea Jerusalem otsitatyetl; kahchu tane Chue niyatoohyellasi taneghaotatich tyiyine, adesklesne chu; inkai mazetse ooli kiyehnton, kahchu kiyaniyutyelessi achunene; ³⁴ Kahchu kiyachaochesi, kahchu kikatootoozassi, kahchu kikyehoozekassi, kahchu kizoohelessi: taiti dzinee awoochi ate tsitike nawootyeissi.

³⁵ Kahchu James chu John chu, Zebidee chue, yachidesha toowe yehtie, Taneghaotatyechi, kooh koosti aghaawoti akootiti sikooh.

³⁶ Kahchu toowe yehti, Yea sachi niioonunassit naghachanasti?

³⁷ Kahchu toowe kiyehiti, Aghaniah sookah ookyehiti, ehlaityi mehoonati, hligi oosklaghazihyeh, nachatinchai kehe.

³⁸ Ahwole Jesus toowe yehtii, Atu atawahti ooli ootahkyeti: atu mihe tuwahto la ayi tsa mehtughastoi? kahchu tunaghakechuhkliti ayi mehtanekhaitsikliti ayi ihe nehakaichihkliti?

³⁹ Toowe kiyehiti, Atu ahandatla. Kahchu Jesus toowe yehti, Kwa hli tuwahtoissi tsaeh ieti otsi tughastode; kahchu ayi mehtukhaitsihkliti mihe tusakechihkliti ihe ayi ihe mihe naghakyechuhklitassi: ⁴⁰ Ahwole wostyi chisinchi chu tayaghetichu oosklaghazintye atu si sen-atunne eli kaooali; ahwole kooyachulelassi ayine kooya so-ochesunne,

⁴¹ Kahchu kenetyine aghatitsuk chi ohtye atu yatsi kyehanelilon James chu John chu. ⁴² Ahwole Jesus tyechi yehtilon toowehchu yehti, Atawahti ayi kechanehtya kehe kikaootsutti ayi achune kooyake-

olech; kahchu kootaityiye kooyaghatah. ⁴³ Ahwole naghai atu kooh akehe naghahyeissi: Ahwole ayi koonoochu sachatoohcha kooti, naghani ayi nagha keo-otichassi: ⁴⁴ Kahchu ooline assine naghani ihe haladi miindichatoesi o-ochi chatoohchai gha, tane glia keo-otichassi achanetye gha. ⁴⁵ Ayi aghoo teze Chue atu makeochatichi ihe yuhchideya, ahwole tane gha keo-otichassi, kahchu khaoollu yeghataisi natlone yatachi ootane.

⁴⁶ Kahchu nighanintyetyl Jericho: kahchu Jericho otsi hatayaooch yaotatichne chu tane natlone chu, mataituehi Bartimaeus, chue Timaeus, tinkuzze satah tyechihi ihe. ⁴⁷ Atitsuk chi ayi Jesus Nazareth chih-tatyetzutti, ohtye tyi otyesta, kahchu toowe yehti, Jesus nai chue David, soonchoonaya.

⁴⁸ Kahchu natlone yatati atu awotihi gha: hoontye ooli otaihchi ohtye otyesta, David chue, soonchoonaya.

⁴⁹ Kahchu Jesus hlininiya, kahchu kwehakehe ehti. Kahchu tyechi kiyehi ayi teze mataituehi, toowe kiyehi ihe, Kyeneneli, niya; tyechi nehti. ⁵⁰ Kahchu ooyadehchus yiatehtakadi, niya, kahchu Jesus tsidyeha.

⁵¹ Kahchu Jesus otyesta toowehchu yehti, Ye sachin-oonunisita anusleha? Ayi mataituehi teze toowe ehti, Aghaghintai, setai saanaoontlihi.

⁵² Jesus toowe yehti, Taihchi ootinta; na-ihe naghinta. Iitetyeh matai naootli, kahchu Jesus kyehtesha atghunni.

Tghachyestla keneti ehlaite matgha.

11 Kahchu hwa aghaty Jerusaleem, Bethphage chu Bethany chu chisinchi, khis kuchi Olives aghaty, yitaityeha onketyene yaotatichne, ² Kahchu toowe ehti, Taihchi otsitahtyel yito kwa oontlo chi naghanataihchi: kahchu kweghaachatyeh soosooklya aghahyehlassi taghaklu, atu makai achaty; tahwahut, kahchu yuhchinaghahyeh: ³ Kahchu ooline toowe naghai tyete, Yehoo gha koohghahya oontye? kooh taghahiti, Metihi tiye hehti; kwete cho otsi nayaduesi.

⁴ Kahchu yitaighatestyetyl, kahchu soosooklya kiyinty taghaklu tusklahooka atghunni yaghintyidi; kahchu tahkiyainghut. ⁵ Kahchu tahkie iiti naihyani toowe kiyehi, Yehoo gha kooh hahtya oontye taghauiti soosooklya? ⁶ Kooh kiyehi koohoty ayi Jesus akooyehiti: kwa kootayinchut. ⁷ Kahchu soosooklya Jesus gha naghunihty, kahchu kiyeatetahkatti keghihla; kahchu yakaisata. ⁸ Kahchu natlone kiyeatetahkatti atghunni tsiyaghestla: kahchu achune naghaghilul tatsi tachin tsi, kahchu ghatyeh atghunni ghatunihla. ⁹ Kahchu ayine haladi atine, kahchu ayine tanekeghataihne, oghatyesta, toowe ghatieh, Hosanna; Moohchuooyaya ayi yuhchideshai yindizi ihe Naghaghatai:

¹⁰ Koonoochu moohchuooyaya manataghe nagha tgha David, yuhchideshai tindizi ihe Naghaghatai: Hosanna ayi zon o-ochi yataihchi miindiotehah.

¹¹ Kahchu Jesus kwiya Jerusaleem, o-ochi tyetachatlihi kwa chu: kahchu kootoo anetye ooli ookaghanehtghachi, kahcu kahkachi aoocha koohnioonizutooh, hadesha Bethany tsi keneti onketi matgha chu.

¹² Kahchu naodike tsi, ootastyetyl Bethany tsi tapat: ¹³ Kahchu chiche chok chine toontyetsi ya-i maton ooli, yuhchidesha intyizon ooli ion ate: yuhniya tsi aton zon yilah; atu ka chiche nichatilesti kho nioonizut ihe.

¹⁴ Kahchu Jesus otyesta toowehchu yehti, Atulire otsit-sassi chiche nai ihe too otsi nioonizutti otsi. Kahchu yaotatichne oohatitsalon.

¹⁵ Kahchu nighanintyetyl Jerusaleem otsi: kahchu Jesus kwiya tyetachatlihi kwa otyiyi, kahchu hayadesla ayine atagholane kahchu ataghatotane tyetachatlihi kwa otyiyi wota, kahchu yechonayadehklit yakeehtai ayine sooniya klaghayihne, kahchu yestahi chu ayine oyetli tagholane; ¹⁶ Kahchu atu hatyeh yasehlai iyu maaontyete ooline yatooai oolita tatawochulih tyetachatlihi kwa otyiyi oota. ¹⁷ Kahchu yaotatich, toowe yehti ihe, Koo atu kooh akehe nichatinklessi la, Sa kwa anetye tane tyetachatlihi kwa wowohyih? Ahwole kooh awaht-la anoosine take.

¹⁸ Kooh adesklesne chu taneghaotatichne tyiyine metihi chu oohatitsuk, kahchu onkhaghanatgha tye-ha kehe chahteakiyule gha: yeghanejit ihe, aitye tane khaooghulli ihe yachihootehe.

¹⁹ Kootoo kahkachi ooli tsi, hadesha nitokwa wotyih tsi.

²⁰ Kahchu hatlindo aoocha, taihchi ghataihlu chiche chine maghaye otsi ya-ikoonoo kiya-ih. ²¹ Ayi Peter kyejetitihyu toowe yehti, Taneghaotatyehi, makintgha ayi chiche chine atu tyeswe adintii kwa sakoon.

²² Kahchu Jesus otyesta, toowehchu yehti, Nagha Tgha aha oodinti. ²³ Atai kwa hli anaghaisi, ooline ti khis atyetane, Achu ninintsit kahchu otsinachatoohyeli tu chok tsi; kahchu atu tawahkootye ate tadzye ihe, ahwole ihe kootilon ate ayi ooli ehtii sakyehchi niwotsitti; awohiisi atghazi ooli tyekootesi. ²⁴ Ayi ihe anaghaisii, Ooli si nioonunisitassi, aghaswehlye ate, ihe kootahti nitaghahali, koohzon naghahaisi.

²⁵ Kahchu natahya otye aghaswehli intyizon ooline oolakehe chahte meititaa ate: Nagha Tgha naghai chu ya tehchi ati naghaoochatoohulassi nagha metselihi.

²⁶ Ahwole atu ootalai ate, atu naghani chu Nagha Tgha yatehchi ati naghaooodohulassi nagha metselihi.

²⁷ Kahchu yuhchighatestyetyl Jerusaleem tsi: intyizon ghayahlhu tyetachatlihi kwa otyiyi oota, yinkhadesha taneghaotatich metihi tyiyi, kahchu adesklesne, kahchu haladi meindi chatehaneh, ²⁸ Kahchu toowe yehti, Ye makaoonatsut ayiwoh keonaahch aontyete? kahchu mea nayiwa tidi kakaoodzutti keonaahchi tidi ooli?

²⁹ Kahchu Jesus ateyatetla toowehchu yehti, Suni chu ehlawotatyete taontya naghosyeassi, kahchu satatahti ate, naghatahuysi ye kakaoodzutti kooh akehe kewohahch aontyete tidi ooli. ³⁰ Matukeghihliti John yatai-

hehi otsi la tatyeesut oontye, tane tsi koole? kootatinti.

³¹ Kahchu inchioghatatyech, toowe ghatai ihe, Koohtitye ate Yataihchi otsi; kooch tootyeezi, Yehoo gha tawah tahtyaoontye? ³² Ahwole koohtitye ate, Tane tsi; tane eghanejit: ayiwo aitye tane kookkiyehti John, yaghi kwa hli tanetaghatatahchne ali.

³³ Kahchu ooghatyesta kahehu Jesus tsi toowe kiyehi, Atu koowoti. Kahchu Jesus otatihch toowehchu yehti Suni chu atu naghatahsesi naghakaoodzutti ayi ihe keonaahch tidi ooli.

Tghachyestla keneti onketi matgha.

12 KWA tyi yaotatich yiheaghasule. Ehlaitye yaghi tane oonehye chiche chok chine ochunehyehti, kahchu anetye ootaisuggi oola lon, kahchu hayaghinkyetlon ayeti chiche tu taaohklitigha, kahchu nayaghintsih khaghatai kwa, kahchu yaniyiooh oonehyene tane, kwa tontyetsidesha. ² Kootoo koonoonizutooh otsiyateha ayi ehlaitye yakeotiche yinkhadoya natlone tezoo, yayual assilon chiche natlone tezoo chiche chine oochunihyehi tsi. ³ Kahchu nighatintyi, kahchu kikutatooz, kahchu tahzoh achukihete. ⁴ Kahchu yachideha achune woaine; kahchu ine tsihadehyitl, kahchu tsinakoozehai yetsi ihe, kahchu achukideha maooya ooli. ⁵ Kahchu achune outsideha; kahchu ayi hazehai; kahchu achune natlone, tahkine chu kikutatooz, tahkine chu kizehai.

⁶ Kwaka ehlaitye machue ayehi, o-ochi mandayadetlahoo, ayi chu haistlachi yachiyadeha toowe ehti ihe, Kiya indi nootghahassi sechue.

⁷ Ahwole ayine oonehyene tane toowe hlaghatati, Tunela katsila kakaoozutassi; kwa hoote zaoogheli, kwa naghani kakao-odzutassi. ⁸ Kahchu nighatintyi, kahchu kizehai kahchu khakitihtyi chiche chine ochenihyehti iite otsi.

⁹ Yea aoti ayi kakaoodzutti chiche chine ihe ochanahyehi? yuhchinatlone chahtawoleissi oonehyene tezoo, kahchu achune chiche chine ihe ochanahyehi ghaoalassi. ¹⁰ Koo kahchu atu makeh ootaghatichila tidi aduskles; ayi tsye kiyenali? ayine nito kwa aootline ayi hatse oohniya sookewostidi: ¹¹ Tila Aghakaoodzutti makyeoahchi, kahchu ohtye kawochulih naghataitgha?

¹² Kooch chu oonkhaghanatgha kiyuhchutigha, ahwole tane eghauejitlon: aghatane atawo-otihi ihe akoyehi ihe ayi meaghasoochali: kahchu kiyechutestyetllon, taichi ghanintyetyl yu.

¹³ Kahchu kichiteha tahkine Phariseene chu Herodiana chu, kiyukluhchi gha yazake. ¹⁴ Kootoo nighanintyetyl tsi, toowe kiyehi, Taneghaotatich atawotihi hlodinti, atu chu ooline inaoohoontyassi: atu chu kyinditanaha tane oontya kehe, ahwole taneghaodintich Nagha Tgha oontya kehe matlontideh: Tsiwohzon la machulelu mehtikechilehe sooniya Caesar, intooe ate chu? ¹⁵ Kaoyeli la, atu kaoyeli koole? ahwole atai ata-

wonatioo meaneae, toowe yehti, Yehoo gha sakaootahun aontye? sananahah sooniya satsoone, wosyekhai. ¹⁶ Kwa nakiyiooh. Kahchu toowe yehti, Mea achintye sikooh kahchu takehnichatinklesi mindizi? Kahchu toowe kiyehi, Caesar tsi.

¹⁷ Kahchu Jesus ateyatetla toowehchu yehti, Caesar ghanahah ayi ooli ayahi Caesar, Nagha Tgha chu ooli ayahi Nagha Tgha. Kwa Kiyaooolih.

¹⁸ Kootoo kooyinkhachatestyetyl ine Sadducee yaghine nachaghintai oontoe ghatine; kahchu taoontya kiyehi toowe ghatai ihe, ¹⁹ Taneghaotatyehchi, Moses aghaadusklesiih, Ooline mekye tehtsut, ate, matsiyue chu yechodyesha ate, kahchu tsito atu yechodyesha ate, mekye matsiyue niyatahtyeloo, yaskyege yayanuhi tsito mekye. ²⁰ Oowhilihi taiuchine hlyehligi ghili: kwa ayi hatse tsege nitintyi, tehtsutooh atu tsito yechodyesha. ²¹ Kooch chu haladi tachi tsege ninayatihtyi kahchu tehtsut atai chu atu tsito yechodyesha: haladi tachi ayi chu kwaka hlyeih. ²² Kahchu taiuchi aline aghahiii, kahchu atu tsito yechoghatatyel: hli haistlahchi ayi tsege tehtsutii. ²³ Hooghaghintyetyl tsi, tsitike ghaiskye tsi ooli ate mea soo ate yakahoota tyiooh? taiuchi ghili aghanetye kookahsatalon.

²⁴ Kahchu Jesus ateyatetla toowehchu yehti, Atu kha yaghayala, atu itawahtih ihe, aduskles tyiyi, Tikeaootli koole manatsutti? ²⁵ Kootoo tsitike ghaiskye ate koozetse otsi atu inkah tueakoochila koole atu chu hlakoochilalon; ahwole keotihchi tyiyi yeghinhtyelon yataihchi ati. ²⁶ Ahwole tehtsut ine, tsitike nawokyesi: atu makyeh ootaghatyechtah ooli la Moses adusklese, tyeha yehti kat tsaghehtonti Tikeaootli yechiintechii, Suni Tikeaootli asli aontye Abraham tgha asli, kahchu Tikeaootli asli aontye Isaac tgha asli, kahchu Tikeaootli asli aontye Jacob tgha asli?

²⁷ Oochu natoone atu yeta odeha ahwole yaghitane gha: ayi ihe o-ochi kayaghatat.

²⁸ Kahchu ehlaitye adesklesi yahchidyeha, kahchu atisuklon ihe inchiotatyech otye, kahchu atawotihoo tsiwohzon ateyatetlalon, taoontya yehtilon, Tyeya ootaihchi hatse tsiwotsatyehli?

²⁹ Kahchu Jesus toowe hakehe ateyatetla, Hatseto tsiwotsatyehli anetye asikooh titih Nea oozintso, Israel; Naghaghatai Nagha Tgha atane zon Naghaghatai aontye: ³⁰ Kahchu maooontye Nagha Tgha Naghaghatai atghe nedzye ihe, kahchu atghe matsinde ihe, kahchu atghe nindi ihe, kahchu atghe nanatsutti ihe: ayila hatsetoh tsiwotsatyehli. ³¹ Oo ayi onkye kwa hlye oontye, toowe hakehe, Mataghoonti nehtanoone natsun matintya kehe. Oontoe tsiwotsatyehli ootaihchi miindichatoohai tizon.

³² Kahchu adesklesne toowe yehti. Kwa hli Taneghaotatyehchi, kooch tintih hlonthati: ehlaitye zon Tikeaootli ali; atu achune atune zon: ³³ Kahchu machutye atghe khadzye ihe, kahchu atghe atsatsuk ihe, kahchu atghe khatsinde ihe, kahchu atghe mehnatsutsut ihe, kahchu yuatutih yetanoone atwati yakehe, ootaihchi

kyeindi ooteha ayi aghoo atghe tsichatihuli chu inghade keochaachi chu.

³⁴ Jesus wa-inchi ooyu tahwohzon, toowe yehti, Atu tontye tsi anatih Nagha Tgha nataghe otsi. Atu ayi keh taoontya atu nichatitah ooli.

³⁵ Kahchu Jesus otyesta toowehchu yehti taneghaotatyechoo sahtgha tyetachatlihi kwa tyiyi oota, Yehoo gha adesklesne kooghatya oontye Christ David machue? ³⁶ Ayi ihe David atane koochati kooehtii Atsinde Oochu ihe, Kakaoodzutti kooyehtii Sakaoodzutti, Nuni sinta nohtichintye atehzonih aiseakooyasle ate tsintanine.

³⁷ David atai hoochati nai Kakaonadzutti yehti; tyechi otsi gha machue yilontye? Tyetaisanaine kye-hanelilon oochu kititsalon.

³⁸ Kahchu toowe yehti machiootehe, Matsagha ghahata adesklesne, tane ayine kwaghintyene koo kestue yaintyesne, kahchu kwaghintye kyila chihchiche inchi-atahachulihti. ³⁹ Kahchu asta otyihti tyetachatlihi kwa, kahchu o-ochi nataghisatoooh asta kwehluchayihiti: ⁴⁰ Chahte akiyila ya kwa waatyih, kahchu tane ghanaa-hooh oontyes oohatatyech: ayi ti otsinighatooalassi ohtye otaihchi ketselihoo keochaahchi.

⁴¹ Jesus chu sata sooniya ninchatilesti oghade, kahchu tane ya-ih iotsi sooniya otsiyatelyihoo kweotsi nichatilihi sooniya; natlone chu tatintlone natlon kwechihatehul. ⁴² Yuhchidesha ehlahti tsege tiesunni waatyih ali, kahchu kwehchiatehyitl o-ochi yaintsutli onketya sooniya satsoone toolya ehlahti sooniya satsoone enetya eyontyi.

⁴³ Kahchu yaotatichne tyechi yehti, toowehchu yehti, Kwa hli anaghaisii, tai tiesunnioo waatyih naghataihchi ohtye kwechiatestla, anahtye naghai ooia kwechitala sooniya nichatilesti: ⁴⁴ Ayi ihe aghanetye kwehchighadestla kootatintlon otsi; ahwole atai yindatli otsi kwehchiatehyitl anetye ayehesi, anetye ooli yighataisi.

Tghachyestla keneti taiti matgha.

13 HOONTATAHOOH tyetachatlihi kwa otyiyi tih otsi, ehlahti yaotatichi toowe yehti, Taneghaotintichi, nea ti tsye naih atotye, kahchu nito kwa atotye chode ooli!

² Kahchu Jesus otyesta, toowehchu yehti, Onaila tidih kwa tyiyi tonli? atu ehlahti woo meachu chatuyesi tsye tasaoo nachatihulassi.

³ Kahchu sata klataihchi khis ke Olives ooghade tyetachatlihi kwa tyiyi, Peter chu James chu John chu Andrew chu taoontya kiyehilon sahti aghati zahtgha, ⁴ Aghatatinti, taisatsi ooli khoonioozit aontye? kahchu ate taootyaontye kootoo anetye ooli ooghade nininkye ate?

⁵ Kwa Jesus atoyatetla toowehchu tyi ehti, Tyeke atuline naghanooah: ⁶ Natlone chu yuhchighatutyellassi sindizi kehchi, toowe ghatuti ihe, Suni Christ; natlone

chu ghanooahassi. ⁷ Kahchu atahtsuk ate natsapahi kahchu natsapahi eoyu ate, atu nagha khaz-atawahtyel: ayi etye ooli kehchi nio-otsitassi; ahwole halohchi atuka koohnao-ozitassi. ⁸ Ayi ihe ehlahtidi tane ghataghitodeh kiyinkha ghatapah achu tanane, kahchu tane tike inchi niiahch: kahchu eonetye tsi tike ootooloone tsi, kahchu wo-olyesi to khasihai tsookachatayahi chu: ayila tatyeeski ochati kyeat-sunatsitti.

⁹ Awole achukhahahta naghai: naghaghatoochitassi tsiwotsatyelchi; kahchu tyetachatlihi kwa oota naghaghatsutyessasi: kahchu nanaghachulelassi haladi tsiwotyih metihi o-ochi metihi tyiyi chu suni ihe, ayi ihe kooyeh ooghachtichoo. ¹⁰ Kahchu otich oochu ihe hatse kooyehoochutchassi tike okehe atghe tanane tsi.

¹¹ Ahwole otsinaghachataistle ate, kahchu naghachataitsut ate, atu ahunataihchi kindiwahtsit atawahtyakehe sootasun koole ataghahkyakehe: ahwole ooli si naghachualassi ayi sakehchiaghali ayi otahtich: atu naghani otahtyech ahwole Atsinde Oochu.

¹² Mekye taza ihe yatutsitassi azeche tsi mekye, kahchu atghe khachue; kahchu tsihone koonahchine niwotyelassi, kahchu nakiyuteissi tsazuheli gha.

¹³ Kahchu naghai tane naghachatuh Ikeassi sindizi ihe: ahwole ayi ayuhi haistlahchi otsi, ayi nachaohtaisi.

¹⁴ Ahwole wa-itah ayi metselihi chahtehnitsutsiti tsi kamaotatyehchi Daniel atanataihchi atawatihi nachaghintsitti ayiti o-otooassi lon, (ayi aghasule inkai ootootsukki,) inkai ayine Judaea aline khis tsi gha-toowhezi: ¹⁵ Kahchu ayi tahtaghatsti nito kwa atu noocha nito kwa otsi, koole atu ayite kwewoya oolitalah nitooaluh makwa otsi: ¹⁶ Kahchu yaghi achunihyehti oota ati atu tahnatoocha yehatyetakhati niyatooallu.

¹⁷ Ahwole atu oochu awohtyeissi ayine koozita tsito tehtsine, yaghine chu tsito yehtochne ayi dzinee!

¹⁸ Kahchu aghasuahlih nahuthataklihi atu yaske ooli.

¹⁹ Ayi ihe dzinee oolezi tsookachatayahi, ayi etye natoohi zon ooliih toh otsi hatseto tike ooli toh otsi Nagha Tgha ayilahi, kwa hlilon too otsi, atu koole o-otoowesi.

²⁰ Kahchu atu Tikeaootli dzinee nakhasse oolai ate, atuline ootaizilon: ahwole matghachihchine tsi, yatgha-ihchilon, natya oolalon ayi dzenee. ²¹ Kahchu ooline toowe naghahtye ate, Nea, taila Christ; koole nea, yaghitih atih; atu a Kootaghahti: ²² Ayi ihe atu tyeswe Christ kahchu atu tyeswe ghaghatane niwootyellassi, kooh chu kiyuesi ehtole kahchu kawochuli, aghanooahi gha, awowootli iyu aontye ate, matghachihchine. ²³ Hoontyeoo khama-inditahsit naghani: nea, naghatasiih atghazi ooli ootagha.

²⁴ Ahwole ayi dzinee, kaohtzut ate ayila tsookae-hatayahi, sa ihewohelassi hatleke iza chu atu kaoalassi maootaghe, ²⁵ Kahchu yataihchi sun ooli nakyellassi, menatsutsutti yataihchi ta ooli yatooloonassi.

²⁶ Kwa ayiti kiyueissi teze Chue yuhchidesha khoos tgha o-ochi mehnatsutsutti chu tsatinchai chu. ²⁷ Kwa iiti otsiyateha yakeotihehi tyiyi, kwa chu nachaghanooellassi yatghachihchine tyeotatyechi otsi ninchi, o-ochi tike wolonhchi otsi kwa hlilon o-ochi yataihchi lonhchi.

²⁸ Kwa hooote ookaatawahti mihe achati chiche chine tsi; kootoo kwaka matatse natsutletonh, kahchu ato nehyehta, atawahtihoo hwaza atoleh ooli: ²⁹ Kooh otye naghani chu, wa-ichi tidi ooli koohninkye ate, atawahti kwa hwa ooli, tusklah koole. ³⁰ Kwa hli anaghaisii, taine yahlaniyune tanane atu koolonh oolesi, aise atghe ooli tidi achahi. ³¹ Yataihchi chu tike chu o-otooesi; ahwole sezake atu woloh oolesi.

³² Ahwole ayi dzinee kahchu ayi sakehchiahali atuline atawoti, ama, atu keotihchne tyiyi yatehchi atine aghoone khachue aghoo, khatgha zon. ³³ Tyeke naghai, ootanahi kahchu aghasuahli: ayi ihe atu atawahti kooh nawizut ate. ³⁴ Tezoo Chue ali ihe tezoo yetye tontyetsi tatyeh ihe, tanito kwa kyechotyeha, kahchu yatsiwosta yakeotichne, kahchu anetye tezoo keotihch akehe, kahchu ayehtii tusklah khaghatai ootanoo gha.

³⁵ Ayi ihe ootanahi: atu atawahtihoo aontye kootoo ni-to kwa khaghatai naoochati, kahkachi koole, hatleke tatichi koole, tihchok otyesta zahtgha koole, hatlindo koole: ³⁶ Intyizon nooja ate, atu nahoohtyeloo satyechu. ³⁷ Kahchu ayi anaghaisii anetye kooyesi, Oonahi.

Tghachyestla keneti tinti matgha.

14 Onkyeti dzinee oolesta ooli kwehlachayihii passover achati, kahchu otles atu chehyutli: kahchu taneghaotatyechi tyiyine adusklesne chu oonkhaghanatgha oolakehe naonai nighatuhtyeli gha, kahchu kizuhelyu. ² Ahwole toowe ghatai, Atu kwehlachayihii dzinee eli, atu tane inchiniootyelu.

³ Kahchu ali Bethany tih ma kwa oota Simon chusache ayahi, intyizon sata atsitsoo yuhchidesha tsege ayahi khluk tsye khaisis spikenard otsi o-ochi matahi natlon; kwa yataghataghiooh tsye khaisis yitii, kahchu yatsi kachi nayadinklit.

⁴ Kahchu tahkine atu keghaneli kooyindi ihe, kahchu toowe ghatai, Yehoo gha tidi ghatsatyestka tidi khluk?

⁵ Ayi ihe ataghachulekhai ootaihchi tghakooh keoneti ketyi sooniya satsoone ihe, kahchu tyetaisanaini ghachulelakhai Kwa atu tyeswa akiyehti.

⁶ Kahchu Jesus toowe yehti, Atu machuwahti; yehoo gha machisootahtyihch? ootaihchi oochu saatyihh.

⁷ Ayi ihe inkaa eahline tyita-isanaini, kahchueonetye akootahti o-ochi akooyaghaklehesi: ahwole suni atu inkaa nagmaasli. ⁸ Koo hatiih machitelonh otsi: ootagha yuhchidesha yuhthlukke gha oochu nisachutyel gha. ⁹ Kwa hli anaghaisii, ooli tsi otsi tidi

otich oochu moohwochatih ate tike okehe, tidi chu atii moohwochutyehesi menachutihi gha.

¹⁰ Kwa Judas Iscariot, ehlahti keneti onketi matgha ihe, yinkhadesha taneghaotatyech tyiyi metihe, ooli oochadehyitli kyehodewoosh, ¹¹ Oohaditsuk chi, ohtye kyehanelilon, kahchu ootagha tsi akiyehtilon sooniya yaooledi. Oonkhanatghalon tyehakehe sookah nio-ot-sitigha chahte autigha.

¹² Kahchu hatseto dzinee otles atu chihyutli, kwa ooghazehai passover, yaotatichne toowe yehti, Tyecha koodinti nataghasootaoozani ate oonsitsi passover?

¹³ Kwa onkye tane yaotatichne yitai tyeha, toowe-hchu yehti, otsitahtyel nitc kwa otyiyi tsi, kwa matiti tagahazasi ehlahti teze yaalu ehlahti mehtukachatayehi taismanooh tu ihe: makehtahaz. ¹⁴ Kahchu kwiyesitti, toowe ahti nito kwa kakaoodzutti, Wondi achune kwa ayiti o-ositsti passover mawotastihchne chu? ¹⁵ Kahchu wahih naghotyehi ooncha tyinta ooli chelohchi soowachisunooh: Naghani gha iehti soowatahsun.

¹⁶ Kahchu yaotatichne yitaighatestyetl yuhchi chu ghatatyetl nito kwa otyiyi tah, kahchu woghiooh akooyehtiii: kahchu yatagha sooghihsun passover.

¹⁷ Kahchu kahkachi yuhchinooja keneti onketi matgha chu. ¹⁸ Ghadehtsi zahtgha kahchu eghinta, Jesus toowe ehti, Kwa hli anaghaisii, ehlahti naghai chodeh sakahtane chahte asooti.

¹⁹ Kwa tyi atu keghaneli, toowe chu tyi ghatai ehlaityekooh, Suni la? kahchu hligi toowe ehti, Suni la?

²⁰ Kwa ateyatetla toowehchu yehti, Ehlahti kenetye onketi matgha ihe, yaghi tila ihe setyi tsa ihkye. ²¹ Tane Chue otsidesha, takehnichatinkles akehe otye: ahwole atu oochu oontye yaghi teze tane Chue mihe atahachahi! otaihchi o-otaizilon yaghi teze ihe atu niniya tah ooli ate.

²² Kahchu aghatsitsoo zahtgha, Jesus otles tyes nidiooh, kahchu merci ehti, kahchu tahke yataghiyts, kahchu yayiooh, toowehchu yehti, Nitahah, mehtah: tila sazi alonte.

²³ Kahchu nidiooh mehtusato, kwa kayioo merci, yayiooh: kwa aghanetye ayite otsi tughatolon.

²⁴ Ahwole toowe yehtiii, Tila sa tulle alontye aduskles koonde ihe, oontlo chi otsi tyechihkliti. ²⁵ Kwa hli anaghaisii, atu otaihchi wostoiissi machiche chiche tu chine tsi, kwa hlilon yaghi dzinee kwa kootyinuusto Nagha Tgha nataghe.

²⁶ Ehlahti hyin eghachinooh khis Olives tsighatestyetl.

²⁷ Kahchu Jesus toowe yehti, Anahtye naghai atu oochu inditaghaaisi suni ihe too hatleke: takenichatinkles akehe, Ooshalasi aspai ghaghatai haslai ite eone-tye tsi natihassi aspai. ²⁸ Ahwole tsitike netai ate, naghaghatushezi Galilee tsi.

²⁹ Ahwole Peter toowe ehti, Inkai ahwole aghanetye atu keyaneli ate, hoontye koole suni intue.

³⁰ Kahchu Jesus toowe ehti, Kwa hli anesi, tidi dzinee, tidi hatleke te, atu ka onkye otyesta tyeh tihchok, tghakooh oohchit soota-ghoontyehi.

³¹ Ahwole otaihchi otatich hlotuhsi kootieh, Ahwole nakah tanesut ate ooh, atu ihlawotatehoo oohchit noodustyeisi. Kwakooye otye aghatane chu ghatiih.

³² Kwa koohnaghintyetyl Gethsemene woyetih: kahchu toowe yehti yaotatichne, Nea aghasushlito sakyeh. ³³ Kahchu yehtestyetyl Peter chu James chu John chu, kahchu o-ochi inditatunne, kahchu matsun tah oonkhail acha; ³⁴ Kahchu toowe yehti, Setsinde o-ochi atu oochu atyetatih azetse tsi: chode ahthli naghai, kachchu ootanahi.

³⁵ Oontsutle wotaihahi otsidesha-ih, kahchu tike wozohthih nwatsutooh kooyekchih tyetaooklihasi sye makehchi nio-otsilon, ayi sakehchi ahalai yao-otsitoo. ³⁶ Kahchu toowe ehti, Abba, Tyeih, atghazi ooli tahnootsut nuni; tidi mehtutsato saone naniah: hoontye ooli atu suni koosti, ahwole nuni koodinti.

³⁷ Kwa yahchidesha, nayintyi satyi, kwa toowe yehti Peter tsi, Simon sintyi la? atu ooniila ehlaiti meochanehoo? ³⁸ Oonahi kahchu aghasuhli, atu ot-sitawohazu inkaoochatauntih. Atsinde kwa hili ootagha, ahwole khazi chintyeh.

³⁹ Kwa yitai tyesha, kahchu oghasulih, kahchu kwaka ayi zake ihe ootatich. ⁴⁰ Kwa oondehsha tsi, yintyi satyi kahchu, (kootai ya-inkhai ihe,) kahchu atu ataooti atyekitooklih akehe.

⁴¹ Kwa tghakooh yuhchidesha, kahchu toowe yehti, Kwa hwe satyih, kahchu niwotahah mehnatahyihi: kwakoole, meochanehoo koohnaooizut; nea, tezoo Chue mataghachila taghila tsi metselineh. ⁴² Niahtyel, yitai tawotyeli; nea, yaghi atu oochu asehti kwa hwa atih.

⁴³ Kwa kwete, kwaka ootayehchoo, yuhchidesha Judas, ehlaiti keneti onketi matgha ihe, kahchu yihtestyetlooh tane natlone simakanis pyese chu mekachatayitli chu, taneghaotatyehchi metihi tyiyi ihe, adesklesne chu hoola atityine ihe.

⁴⁴ Ooh yaghi atu oochu ayehtii yayiooih mehyachantsiyi, toowe ehtieh, Ootayatasihchassine wohtsiewohzyesi, ayila ayi; nintahtyeh, kahchu yitai tahtyeh tyekhe. ⁴⁵ Itetyeh nooja ate, tsiwonzon yatsi anaatahlu, toowehchu ehti, Metihi, metihi; kwa yunchighachi.

⁴⁶ Kwa kiyinchut, kahchu nighadintyi. ⁴⁷ Ooh hligi ayiti naghatehyane tapyese natyese ghayaghachut, kahchu nayatehul yakeotihchi taneghaotatyehchi metihi tyiyi, kahchu yatsakhe tyeghihyitl.

⁴⁸ Kwa Jesus ateyatetla, toowehchu yehti, Ihla unoosi khataachila pyese intyesi yu mekachatayitli yu tala nisataghahtyelu? ⁴⁹ Naghaikyastaichii dzinee eonetye tyetachatlihi kwa oota taneghaodintihchoo, atu chu nisatayitli: ahwole aduskles tyiyi tikewokyeli.

⁵⁰ Kahchu aghanetye kiyechodestyetyl, kahchu taghoghadehsut.

⁵¹ Kwa ehlaiti uskye yakehtehtla, atetakhatoo chat-achi takulli intyedi ati; kwa uskyegoone kiyinchut:

⁵² Kwa kyechodyesha ayi chatachi takulli, kahchu tghihklah intyedi.

⁵³ Kwa Jesus otsighatehtyi o-ochi taneghaotatihchi metihi tyiyi atindi: kwa ayiti atghe yeghati taneghaotatyehchi metihi tyiyi hoolaatitine chu, adusklesne chu.

⁵⁴ Kahchu Peter tontyetsi otsi yakehteklalon, koole taneghaotatyehchi metihi kwa tsi: kwa yakasatah keotichne, na-itziluh khoon tsi.

⁵⁵ Kahchu taneghaotatihchne metihi tyiyi atghe chu tsiwatilhne oohatakyet otsi ayi ihe atu oochu akiyuti Jesus kizuheli; ahwole atu oontsutli ohwiooh. ⁵⁶ Ayi ihe natlone ketseli hakehe athlaghatati, ahwole atu hleoontye taghasoocha ootihe.

⁵⁷ Ooh tahkine nighintyetyl, kahchu atu tyeswe akiyehhti, toowe ghati ihe, ⁵⁸ Tasitsukiih atyakehe, Chahtehaosoyleasi tidi tyetachatlihi kwa tyiyi atsila kila ihe, kahchu taiti dzinee aoocha ate achu nao-osiasi atu kila ihe. ⁵⁹ Ahwole aghatane chu koosoochawotihhi atu hleoontye.

⁶⁰ Kwa o-ochi taneghaotatyehchi metihi tyiyi ookaze nazut, Jesus tsi taoontya yehti toowe ehti ihe, Atu atyetunatla la? ye ihea ayi chahte anaghatya oontye?

⁶¹ Ahwole atu wotih, atula kehe chu atih. Kahchu o-ochi taneghaotatyehchi metihi tyiyi taoontya yehti, kahchu toowe yehti, Nuni la ayi Christ, ma, Chue Moohchuooyaya?

⁶² Kwa Jesus toowe ehti, Suni ayi: kahchu wahyesi tezoo Chue satah nohtichintye mehnatsutsutti, kahchu yahchityesha khoos yataihchi.

⁶³ Kahchu taneghaotatyehchi metihi tyiyi tanatunne yaghinchil, kahchu toowe ehti, Ye ootaihchi a soochawochatihhi khasootiti aontye? ⁶⁴ Ootahtsukiih mehe at-achochihliti: naghani ta kootahtya? Kwa aghanetye kooye hlaghatati tsazuheli gha. ⁶⁵ Kwa tahkine tyekookeghizek, kahchu yani aghataghighat, kahchu nakiteghul, kahchu toowe kiyehhti ihe, atanataihchi woka atawonati: Kwa keotihchne nakiteghul taghila tyiyi ihe.

⁶⁶ Kwa Peter yiyue nito kwa otyiyi ti ati, yuniya ehlaiti taneghaotatyehchi metihi tyiyi yawoai tsege: ⁶⁷ Kwa ya-i tsi Peter naitziluh, yakaitghah, toowehchu ehti, Kahchu nuni chu mehtintyetliih Jesus Nazareth otsi tatyetzutti.

⁶⁸ Ahwole atu a kooti, toowe ehti ihe, Atu atawosti, kahchu atu atasuk atintya kehe. Kwa hadesha tyinta weswatih otsi; kwa tihchok tayidze otyesta.

⁶⁹ Kwa keotihche tsege kahchu ya-ih, kahchu toowe tyiyehhti ayine ieti nehyane, Taila ehlaiti ayine tsi. ⁷⁰ Kwa kahchu atu koo ooli ehtilon. Kahchu kluhtai ayine ayite nazati, toowehchu ghati Peter, Nuni nooklya ehlaiti aghatane tsi, ayi ihe Galilaeen nali, kahchu kooh nakasse atih.

⁷¹ Ahwole ketseliooh wotyihhi zon ohtye ootatyehch, toowe akehe, Atu atesti tai teze mamawotahtyehchi.

⁷² Kwa onkye tihchok tayidze otyesta. Kwa Peter kyechetehti yaghi sa Jesus ayehtiii, Atu ka ootihoo tihchok tayidze onkye tghakooh oochit sootahootyezi. Kwa hlilon ayiti indi ootinta, nachaihchahli.

Tghachyestla keneti hlahcheti matgha.

15 Kwa kwete hatlindo aoclia taneghaotatyehchi metihi tyiyino aglianctye ehlakehe tsiwohzon tsiwowatilh hoolya atitine chu adeskilesne chu hlito aonetyo gha tsiwoghatsihi ihe ayi chu, kwa Jesus tahkiyagheskluli, kahchu achukcdehtyi, kwa kikalmitj, Pilate.

² Kahchu Pilate taoontya yehti, Nunila o-ochi koometih tyiyi nalila Jewne gha? Kahchu ateyatetla toowohcliu yehti, Kooh tintya oontye.

³ Kahchu taneghaotatyehchi metihi tyiyine chahte akiyehti ooU nation ihe: ahwole atulakehe atyeta-i.

⁴ Kwa Pilate kahchu taoontya yehti, toowe ehtie, Atu lakehe atyetanatla la? nea taitya ooli ihe chahte anaghahti.

⁵ Ahwole Jesus zon atu la kehe aye ih kwaka; kwa Pilate kawoolih,

⁶ Ooh ayi kwelachayih ehlaite yezookeh ninkho kvyecheyesne, ooli assine nioonunisit assine. ⁷ Ayiti hligi aliih Barabbas ooyeih, ihkahtah chaghcsklu ayi yekatichi kwa akiyila indiootaunne, kootoo tane zehai ihe indiootatunne ayiti. ⁸ Kwa natlone ohtye oghatyesta tyi yatsi niooghanunisit kooh hakiyulih gha kooli zon hakooyilai ihe.

⁹ Ahwole Pilate ateyatetla, toowc ehti ihe, Kooh kootahti la naghachitulisitisi Jewne o-ochi koometih tyiyi? ¹⁰ Atawahti ihe taneghaotatyehchi metihi tyiyine yatagliintsutti ihe mihe incho-otsa-i. ¹¹ Ahwole taneghaotatyehchi metihi tyiyine kichinagbayyh tanene, otaihai koochitootsittih Barabbas.

¹² Kooh kahehu Pilate ateyatetla toowehchu yehti, Takootahtya oslihasi kooh yachi o-ochi koometih tyiyi Jewnu woyi?

¹³ Kahchu toowe hakehe oghatesta, Klaniatih ninihtyeh.

¹⁴ Kahchu Pilate toowe ehti, Ye tahtye ketselihoo atyuntye? Kahchu ootailichi o-ochi oghatesta, Klaniatih ninihtyeh.

¹⁵ Kwa Pilate tane gha kasootati chatupisha gha, yakahninooh Barabbas assi, kahchu Jesus taghinchut, yakhataghitoo, klaniai nichuhtyelu,

¹⁶ Kwa simakanisne otsighateli tyi tsiwatyehli kwa, Praetorium wotsatiti; kwa tyechi kiyehi ihlakehe atghe simakanisne. ¹⁷ Kwa natunne taghaghintyi aghapai tatulli ihe, kahchu kiyesklu o-ochi metihi tyiyi chahte hoos chok chine ihe, kwa ita tsi gha ghiooh, ¹⁸ Kahchu tyi yila ooghattoon toowe, Yea mehsuchanetyi, o-ochi kookaonazut Jewne. ¹⁹ Kahchu nakidehul yeti chokhaiye chok ihe, kahchu kikighizek, kwa yatsitaghatsunne ootooghanehzil yatsi nachusghataklihl ²⁰ Kahchu kiyachatyetl atghe tatulli nighadinchus, kwa yanatunne taghinyetl, kahchu ghooghatehtyi klaniai tih.

²¹ Kwa kitahnaghutsut ehlaite Simon Cyrenian ali, ayi kwo noojai, tane natihti otsi Jiadesha, kootgha Alexander chu Rufus chu tahchiatyiyu klaniai. ²² Kwa nakiyintyi Golgotha tsi, ayi tsati, Atsitsunne ooli te. ²³ Kwa kiyayiooh tyewootoo chiche chok tu mathuchunihklito myrrh: ahwole atu niyadiiooh. ²⁴ Kwa klaniai nikiyinti tsi yanatunne atatghahaistla kikaootehunni ihe, ye anetye teze nitioolola.

²⁵ Kahchu oolitalh tghakooh mehooachanehoo awatazoo dzinee ooli klaniai nikiyinti tsi. ²⁶ Kwa achatyesklesi ayiti otsi chahteachatei takehnichanikuchiih ookeh. O-OCHI KOO METIHI TYIYI JEWNE.

²⁷ Kahchu onkyetine chu klaniai nighanihtye unoo-sine; ehlaite noohtechintye, ooh hligi chu oosklaghazih tyeh. ²⁸ Achudesklessi tyiyi tikenikyih, kooh woti, Kahcliu metseline kah kachanehtyeh. ²⁹ Ooh ayine kweghatilhne ayiti oontlochi kiye sootatyihch, tagliatsi ghaghado, toowehchu ghati ihe, Gha, nuni chahta wonatla tyctachatlihi kwa tyiyi, kahchu aonatla taiti dzinee, ³⁰ Aghatinta, kahchu yulichinootinta klauiai tsi.

³¹ Aghatane chu o-ochi taneghaotatyech metihi tyiyine ontlonchi akiyehti ihe toowe hlaghatati ihe adesklesne chu, Nayaghehta achune chu; atai koochati atu aghatatah. ³² Oonka Christ o-ochi koometih tyiyi Israel kwa hoothe klaniai tsi noodoojai, wowoti khai kahchu a kootahti. Oo ayi yakah klaniai yakah atii yataUhlon.

³³ Kwa inchitakooh klodesha sa kehchi ehalai koonaoozutooh, hatleke aochaii tike okehe kwa hHlon kalaketi klodesha sa kehchi ehaiai. ³⁴ Kwa kalaketye sa kehchi ahalai klodesha, Jesus otyesta takaseneodi, toowe ehti ihe, Eloj, eloj, lama sabachthani? ayi tsati ihe Saghintai, Saghintai, yehoo gha sechanila aontye.

³⁵ Ooh tahkine ieti nehyane, ooghatitsuk tsi, toowe ghati, Nea, Ehas kawotih.

³⁶ Kahchu ehlaite otsidehta, kahchu tsifo yeatatih atih tayatohman sootakan chiche tu ihe, kahchu nayiooh klokhayetgha, kahchu yayiooh tuwoto gha, toowe ehti ihe, Atu kinditaghaha; oonka oohwoti Elias nayaghintyi kha.

³⁷ Kahchu Jesus otyesta ohtye ati, kahchu matsinde kwa yecheli.

³⁸ Kwa ayi hlichatinkatii tyetachatlihi kwa otyiyi intyizon tghahkyehchi wotye cheghinchil yataihchi ctis yiyue otsi. ³⁹ Kwa kootoo ayi simakunis metihi, ooghade nazutih. wa-i kooakehe otyesta, kahchu yatsinde yechelihooh, toowe ehti, tyewotye tune teze Nagha Tgha Chue ghilelon.

⁴⁰ Ayiti oohwiliih tsegene ehu tontyetsi otsi ookhaghanehtgha: atai chu iiti atiih Mary Magdalene, Mary chu ma James ooia etanoohlihi kahchu Joses, Salome chu; ⁴¹ (Aghatane chu, Galilee atichi, kikehtyeshaii, kahchu ooli kooyaalih ine;) achune chu natlone tsegoo yuhchi kooyehkyatehch ine Jerusalem tsi.

⁴² Kahkachi aoocha tsi, ayi ihe intyizon dzmee tsi wat-sehlu ayi dzinee Manejitti dzinee tsi ooh, ⁴³ Joseph Ari-mathaea otsi tazehlu, tsatincha tsiwatilh, atune chu ootakah ali Nagha Tgha nataghe, yuhchidesha, kahchu tadzye natsutih seooch Pilate kahkwiya, kahchu Jesus zi ootakyet. ⁴⁴ Kwa Pilate khawooli kwa tehtsalo ate: kwa simakanis metihi tyechi yehti, tauontya yehti tontyeto ghaite chu tehtsuti. ⁴⁵ Kwaatawatih tsi simakanis metihi yatati, tazi ghiooh Joseph. ⁴⁶ Kwa ataghoola tsat-tache oochu takulle, kahcliu nooyaghintyi, kalidm ayi tsatache ii ihe yehtoonicht, kahchu niyanihtyi natine kwa oota tsyekas tayaghintyi, kahchu tsye otsiyehail toosklahchi natine kwa. ⁴⁷ Kwa Mary Magdalene kahchu Mary Josea ma oohwa-ih nichanihtyinti.

Tghachyestla keneti edzetaiti matgha.

16 Kwa Menejitti Dzinee kawohtzut tsi, Mary Magdalene, kahchu Mary James ma kahchu Salome, ataghaghila yu natunetgha tsehklutti, kwa yuhchigh-atatyel ate yu ihe kiyuhklukooh. ² Kwri o-ochi hatse hatlindo ooli hatse dzinee, koohnioonizuiooh natine kwa otsighatestyetl sa niiya tsi. ³ Kwa toowe hlaghatati, Mea tsye yughaii aontye natine kwa tustla otsi?

⁴ Kwa koo ookahanehtghachi, oogha-ih tsye achuhchi nichunihailo: o-ochi ghinchai ihe. ⁵ Kwa kwegliaghintyetlooh native kwa oota, kiya-ih ehlaite uskye nohtichintye chisinchii sata, tasata natyesooh makestue takulooh: kwa oonighanintyetl.

⁶ Kwa toowe yehti, Atu oonighahtyel: Minkhanatgha Jesus Nazareth otsi tatyezutti, klaniai nichanihtyiii: tsi-tike ghinta-ih; atu chode ali; nea nighamhtyintiii. ⁷ Ahwole ootahtab, yaotatichne tatahtih Peter chu

naghaghadesha Galilee tsi: ayiti wahiissi, naghatakyekehe.

⁸ Kwa kwete khooghatastyetl, kahelm natine kwa otsi tsmtestyetl; yaghatilonlon ihe kahchu khaoghali ihe: kahchu atuline atula kehe akiyeliti; oonighanintyetlon ihe.

⁹ Kootoo Jesus niyayii kwete hatse dzine tsiwatselhu, hatse yuhniya Mary Magdalene, ayi taiuchi atsmde metselihi yazi otsi hayateha-ii. ¹⁰ Kwa yatatilon ayine yehkyatehchiine, tsukye atu yaghita zahtgha kahchu ghutsakooh ¹¹ Ooh ahatane, ooghatitsuk tsi ghata, kahchu ya-ilon atu a kooghati.

¹² Ayi keh yuhniya achu akelie ouketye agha tane Ihe, ghataihlu zahtgha, achu tike tsi otsighataihlu. ¹³ Kwa kitati achune: kahchu ama kiyehiti ayine.

¹⁴ Atyechi yuhniya keneti ehlaite matgha aline ghiskye eghehta ootype, kwa yachiotatyech majih oontooei kha kahchu yadzye natsutti kha atu a kiyuti ihe ayi yakehtghaii tsitike nesta.

¹⁵ Kwa toowe yehti, Otsitahtyel tike okehe matatahti obicn oociu anetye tane. ¹⁶ Ayi a kootyeti kahchu tumakechaghinkliti nachawohtyezi; ahwole yaghi atu a kootyeti cliahta chuleesi. ¹⁷ Kahchu tidi yachanahai yakeh ootoohsitassi ayine a kootine; Sindizi ihe kehchi ghakitoolelassi atsinde metselihi; oogliatootyehchassi atsoodi koondi ihe; ¹⁸ Nootuze nighatoohyehlassi; oolita tughato ate chu azetse ahi, atu kootoohthassi; kika-tootiassi yatitihne, kwa oochu nakiyaooliteissi.

¹⁹ Kwa Naghaghatai sakyedesutooh, yatai otsi nichatihtyi, kahchu sata-ih Nagha Tgha nohtichintye. ²⁰ Ahwole achughatestyetl, tike okehe tane chiwoghathi ihe, Naghaghatai kahkeoghathichoo, kahchu sa natsut oola kaootsooli chu intghaninkhi. Amen.